

١٩٥٧
١٩٥٨

صباح الخير يا مصر
علا بركات

صباح الخير يا مصر / ساخر

إعادة تدوير المصريين

علا بركات

الطبعة الأولى ، ٢٠١٠



دار اكتب للنشر والتوزيع

القاهرة ، ١٠ ش عبد الهادي الطحان

المرج - القاهرة

موبايل : ٠١١٠٦٢٢١٠٣

E - mail : dar_oktob@gawab.com

المدير العام :

يحيى هاشم

تصميم الغلاف :

حاتم عرفة

رقم الإيداع : ٢٠١٠/١٣٤٠١

I.S.B.N: ٩٧٨- ٩٧٧- ٤٨٨- ٠٢٤- ٧

جميع الحقوق محفوظة ©

صباح الخير يا مصر

(١)

إعادة تدوير المصريين

علا بركات

ساخر

الطبعة الأولى

٢٠١٠



دار الكتب للنشر والتوزيع

يَا نِعْمَ مَوْلَايَ .. أَكْبَرُ عَشْرِ حَاجَاتٍ يَسْتَجِيبُهَا فِي

يَوْمِكَ وَيَسْتَجِيبُ كُلَّ يَوْمٍ ..

يَا لَعَوْفٍ عَشْرَةَ يَوْمٍ ٢٢

يالآ نعد ..

أول حاجة ..

يمكن هي الصحيان من النوم نفسه خصوصاً لو أنت من
النوع الخفاشي الجميل اللي بتحب تنام متأخر ومضطرب تصحى
بدري.. فتحس إنك مضروب لا مواخذه بالشوز، وأول ما
منه الموبايل یرن تقول: أستغفر الله العظيم هو أنا لحقت أنام !!
تاني حاجة ..

يمكن المنظر اللي حاتشوفه أول ما تفتح عينيك . يمكن
الشخص اللي نام جنبك علع المخدة أو يمكن الشخص اللي
حايص لك من المراه لما تقف تغسل وشك .
تالت حاجة ..

يمكن الهدوم اللي بقالك ستين تلاته مش عارف تغيرها ولا
تشتري غيرها لان المرئب مش مكفي عيش وجينه .

رابع حاجة ..

يمكن الراحل اللي كل يوم يترل معاك في الأسانسير أو يمكن
بواب العمارة اللي كل يوم يتسم لك بغيظ لأنك مش بتنفعه
وتديله فلوس في الرايحه والجايه .. أو يمكن الشحات اللي قاعد
لك تحت باب البيت من النجمة عشان يلحق الموظفين من أول
النهار ويطلب منك حسنه بطريقه بايخه وأنت متأكد إنه أغني
منك ومن كل موظفين الحكومة .

خامس حاجة ..

أكيد .. أكيد المواصلات الزفت اللي لازم تركيبها كل يوم
وأنت رايح شغلك .. كل الناس دي راكبه ورايحه شغلها ..
واحد ساكن هنا وشغله هناك، وواحد ساكن هناك وشغله هنا
طيب ما يتقلوا كل واحد من الشغل البعيد ويحطوه في الشغل
القريب من البيت فيها إيه دي؟!

وزحمه الشوارع و الإشارات اللي مابتخلصش . وريحه عادم
العرييات اللي بتعمل لك كحة .

سادس حاجة ..

يمكن شغلك نفسه اللي بقالك فيه كام سنه ومرتبك مش
مكفيك . وما فيش أمل إهم يزودوك ألف جنيه مره واحده عشان
يادوب مرتبك على الألف جنيه دول يعيشوك عيشه معقولة .

سابع حاجة ..

يمكن رئيسك في الشغل اللي أنت بتسأل نفسك كل يوم
إزاي ده بقى ريس عليك وهو بالغباء ده؟؟، وكم ان كل
مؤهلاته إنه ينفذ الأوامر العليا من غير مناقشه، أو إنه اتعين
قبلك بكام يوم بس .

ثامن حاجة ..

المكتب اللي أنت بتشتغل فيه مكتب مكسّر وكراسي كلها
مسامير وكم ان مفيش تكييف ده أنت لو عندك مروحة سقف
تحمّد ربنا، وتكون نتيجة إنك بتشتغل في الحر ده مع جمهور
داخل خارج عليك كمية عرق عمّوع نفسك وتخليك تقرف من
العيشة واللي عايشينها !!

تاسع حاجة ..

يمكن عدد ساعات العمل اللي لازم تكون من ثمانية ونص
لحد إثنين ونص ويمكن لبعد كده كمان طيب هو يعني لازم
الشغل يكون الصبح كده؟! علمياً الناس نصين نص بيحب ينام
بدري، ويصحي بدري، ونص العكس.. يعني يحصل إيه لو
قسّمنا الشغل برضه إثنين.. نص الموظفين يشتغلوا الصبح،
والنص الثاني يشتغلوا بالليل من الساعة أربعة مثلاً لحد الساعة
عشره؟ والله فكره عبقرية علي الأقل المصالح الحكومية

حاتشتغل طول الوقت وكمان حانعين ناس تانيه عشان تسد
النقص في العمالة .

عاشر حاجة ..

يمكن وأنت راجع البيت في نفس المواصلات المقرفه ومع
نفس ريحة العرق المقرفه برضه، وأنت عارف إنك مضطر نجيب
معاك عيش من الفرن اللي في آخر الشارع عشان البيت ما
فيهوش ولا لقمة للعيال واليه البواب فضل يجيب لك عيش
معجون بالتراب بالإضافة إن ريحته جاز من إيد الست مراته
وده كله عشان حضرتك مستخسر فيه خمسة جنيه كل كام
يوم، وطبعاً أنت مضطر إنك وأنت مروّح تقف في طابور العيش
ساعتين ونص عشان في الآخر تاخد عيش مش باين وشه من
قفاه، وكمان يقولوا عنه إنه مسرطن

عاشر حاجة مكرر..

يمكن رجوعك البيت من أصله عشان تسمع طلبات
متكرره كل يوم وكل أسبوع وكل شهر وكل سنه.. الولد
عايز جزمه، البنت عايزه فلوس الدرس، ماما جايه تزورنا، أملك
بتقول كذا، مرتبي ومرتبك مش مكفي، البقال عايز باقي
فلوسه، صاحب البيت يقول منأخترش الأجرة زي كل شهر..
ده على افتراض إنك معاك فلوس من أصله تتجوز ونجيب عيال

العشر حاجات خلصت ولسه فيه حاجات أكثر من كده
بتكرهها في يومك ..

لسه فاضل برامج التلفزيون المملة جداً جداً، واللسي
كل مذيع فيها حاسس إن البرنامج ده عزبة أبوه يعمل فيها
اللي هو عايزه .

لسه.. خنقتك من قعدة البيت، ولما تحب تنزل تفك عن
نفسك شويه ماتلاقيش مكان كويس تروحه.

لسه.. المذاكرة مع الأولاد والمناهج الغبية العقيمة.. مضطر
غنك تحب عيالك فيها وأنت من أصله كارهها .

لسه.. نشرة الأخبار اللي تسد نفس أي حد لما تشوفها
وكل أخبارها قتل، وتفجيرات، وانتحار، وصور جثث مشوّهه،
ومحروقة، ودم .. هو ليه مايكونش فيه نشرة أخبار مفرحة زي
ما فيه نشره أخبار مزعجه؟!!

لسه.. دوشة العربيات اللي بتعدي من تحت بيتكم، وكل ما
عريبه تعدي تهز البيت كلان فيه زلزال خمسة ريختر معدّي مش
بحرد عريبه نقل أو مقطورة .

لسه.. الدخان بتاع السحابة السودا أو بتاع مقلب الزباله
اللي جنب البيت واللي لازم تشمها كل ليله .

لسه.. الناموس اللي مش نافع معاه أي مبيد، ولا أقراص،
ولا حاجه، واللي أنت خايف ينقل لك أمراض زي مرض
الفيل أو غيره .

لسه .. ولسه .. ولسه ..

" بالذمة الواحد بيدع إزاي في الجو ده . "

يا عم تيدع إيه هو أنت تامر حسني؟! قول بس يعيش أزاي
في الجو ده ؟.

مش عارفه!!

انا بقیہ

از انا موجود ..

من العادات السيئة جدا في مجتمعنا - المصري أو العربي مش عارفه - عادة النقوط .. يعني أن يكون عند شخص ما مناسبة ما فيذهب إليه كل معارفه وجيرانه عشان يدفعوا له ثمن المشاركة في هذه المناسبة .. والغريب ان ده ينطبق على المناسبات السعيدة والتعيسة على حد سواء .. بداية من الشبكة .. فكتب الكتاب .. فالزفاف .. فالولادة .. فنجاح الأولاد .. ثم زواجهم .. مروراً بقي العمليات الجراحية، والتجيس، وباقي أنواع الأمراض المزمنة .. وانتهاءً بالوفاة - آه والله حتى الوفاة فيها مشاركة، ونقطه - وطبعاً بتختلف طرق المشاركة لكل مناسبة .. ففي نقطه بالفلوس، وفي بالحلويات أو الفاكهة أو الهدايا .. لكن تبقى في النهاية ديونا لازم تترد يوما ما وإلا..!

والمشكلة الحقيقية أن نجد فجأة - خصوصا في شهور الصيف - كل المناسبات جت مرة واحدة، وطبعاً اللي اذاني خمسة لازم أردھا عشرة، وإلا أبقى قليلة الذوق ...

وهكذا نجد أنفسنا دائماً في ورطة التنقيط الإجباري.. فإذا
طنشنا فهذه مصيبة كبيرة خاصة في الأماكن الشعبية... فالمرأة
في الحارة المصرية متناقضة إلى حد كبير، ومعاملة أيضاً إلى حد
كبير.. فهي اللي بتعمل تورته فاخرة تكلفها ثلاثين جنيه،
وتأخذها إلى أهل خطيبة ابنها مثلاً، وتصمم في نفس الوقت
على استعادة العلبة الكرتون اللي اشتراها - باثنين جنيه وربع -
لتضع فيها هذه التورته بحجه إن خسارة تسيبها ماها
هيرموها!!

وهي كمان اللي بتقعد تعد، وتحسب لجارتها الفلوس اللي
بتلمها في أي مناسبة من كل الناس بحسد .

فلإزاي تقدر إنك ترضي هذه المرأة؟

والغريب يا جماعه إن كل حاجه ولها ثمن .. يعني النجاح
مثلاً : الابتدائية لها سعر . والإعدادية بسعر، والثانوية العامة:
تانيه بسعر.. وثالثه بسعر.. والبكالوريوس بسعر .. والأسعار
دي تبدأ من عشرين جنيه وحتى خمسين جنيه حسب درجه
القراءة.

أما بقى الأفراح: فالشبكة بسعر، وكتب الكتاب بسعر،
والدخلة بقي الكبيرة بسعر، ويبدأ من خمسين وأنت طالع .
أما الولادة : فتبدأ من خمسين أو حاجه ذهب للمولود .

العمرة : من خمسين وعلى حسب درجه القرابة ونوع الهدية اللي أنت عايزها من المسافر، وفيه ناس ناصحه بتدفع قبل السفر عشان المسافر يعمل حسابه في هديه قيمة تناسب فلوس النقطة .

العمليات الجراحية : اللوز والبواسير والزائدة :خمسين ..
المرارة : ميه، والباقي بيزيد حسب عدد الساعات التي استغرقتها العملية وخطورتها ونوع المستشفى اللي اتعملت فيها..

أما الوفاة والعياذ بالله فلها ترتيب ثاني خالص.. يعني النقطة فيها مش بالفلوس لكن ممكن بالقرص أو بالفاكهة على اعتبار إن أهل المتوفى حيطلعوا بيها القرافة على روحه وممكن كمان بالأكل على اعتبار إن أهل المتوفى مش فاضيين يشتروا أو يعملوا أكل للناس اللي جايه تجامل من آخر الدنيا .

وطبعا عشان محدش يقول : " ما نخوش الفلوس دي ونرد منها بعدين كل واحد إذاني حاجه أردّها له منها. " أحب أقولكم بثقة كبيرة جدا وده يعتبر سر من أسرار الدولة إن الفلوس مصنوعة من ماده أساسها السيرتو مش لا سمح الله عشان تكيف الشعب المصري.. لا عشان تطير بسرعة السيرتو أول ما تمسكها، وده هو السبب الرئيسي إن المرتب ما يقعدهش عشر أيام علي بعض من ساعة ما نقبضه..

طبعاً الرجال مريحة منها من الموال ده من أصله يعني ما
تلاقيش أي راجل مهتم إنه يعرف مناسبات إيه اللي جايه عند
مين وحاندفع إيه وأقصى حاجه بيقولها لما نقوله: " عندنا
موزمه " !!

موزمه باللغة العربية العامية جايه من أزمة يعني مناسبة ما
عند شخص ما تسبب أزمة في باقي البيوت اللي حواليه !!
يقول : " هو لازم يعني .. طنشي وخلاص ."
ولما أقوله : " مينفعش أطنش لأن دي تبقى حاجه وحشه
في حقنا ."

يقول ببساطه : " يعني مش حسبة ميت جنيه مثلاً .."
هو أم المرتب فيه كام ميت جنيه ؟!!

وبعدين فيه شهور معينه بتزيد فيها كارثة التنقيط زي شهر
سبعه مثلاً اللي فيه بتظهر كل نتائج الامتحانات وكمان معظم
الجوازات بتكون فيه مش فاهمه ليه؟ .. لا وإيه الترابط الأسري
بيظهر قوي في المواقف دي .. لا وكمان كل واحد عندها
مناسبة بتجري تنقط قبل مناسبتها عشان ضامنه إن كل جنيه
راجع .. راجع .. خصوصاً شهر الفقر الأزلي بتاع ظهور النتائج
ده .

يا أيها اللي ماسكين موضوع التنقيط ده ما هو يا إما تلغوا
العادة السيئة دي يا إما تلغوا شهر سبعه وخلاص!!

عمار يا مصر

كيف تدير أزمة عالميه في دوله مصريه؟؟

في كل أزمة سواء عالميه أو محليه ، تخترع الحكومة حلولاً غير تقليديه، وآخرها طبعا أنفلوانزا الخنازير . ففي حين اتخذت دول العالم المتحضر إجراءات متحضرة اتخذت مصر إجراءات مش عارفه أوصفها مش خوفاً من الكلمة ، لا بس من خاف سلم برضه .

إجراءات الدول المتحضرة تباينت بين حظر الطيران من وإلى المكسيك، والكشف على القادمين من الخارج بطرق سريعة ولطيفه، وعزل من يظهر عليه المرض، ومنع استيراد لحوم الخنازير من المكسيك، ومحاولة اكتشاف أمصال جديدة للوقاية وعلاج المرض بالإضافة طبعا للأمصال الموجودة فعلا .

أما في مصر فقد كان الإجراء المتبع يشابه ذلك الذي اتخذته مع أنفلوانزا الطيور تماماً وهو ذبح كل الخنازير مثلما تم ذبح معظم الطيور، وبدلاً من توعية الشعب بطرق العدوى وانتقال المرض والوقاية، وتوفير المصل والعلاج وأماكن بالمستشفيات الحكومية، والكشف على الخنازير وتوفير أماكن بعيده عن السكان لتربيته هذه الحيوانات التي ثبت أنها تأكل يومياً حوالي ٧ طن زباله . صدر قرار بذبح كل الحيوانات سواء السليمة أو

المصابة، والسؤال الآن.. أين ستذهب هذه الأطنان السبعة من الزبالة يوميا، وأين ستذهب كل تلك الخنازير ومخلفات ذبحها ؟ طب أيام أنفلوانزا الطيور وهوجة الذبح اللي حصلت دي قلنا أهى الناس كلها بتاكل الطيور لكن علي حسب الإحصائيات إن مصر موجود فيها ٣٥ ألف خنزير وطبعا المسلمين لا يأكلون الخنازير طيب ها تروح فيسين ؟

ومش كده وبس ده الحكومة عملت اللي عليها الحقيقة وأخذت رأي المفتي في جواز دفن عدد كبير من الموتى في مقابر جماعية في حاله إذا المرض قتل نصف الشعب ولا حاجه، والراجل عمل اللي عليه برضه وأفتى بجواز هذا الأمر بس كان المفروض يشترط دفن الستات لوحدهم والرجال لوحدهم والأطفال مع الستات مش مشكله خالص. كما أفتى بجواز معالجه الجثث كيميائيا حتى تستعد للدفن.. يعني ممكن نخطها في حفرة وعليها جير حي مثلا لحد ما تتملي الحفرة بالجثث وبعدن ندفنهم .. فعلا خصصت الحكومة مساحه في الصحراء لإنشاء مقابر جماعية عشان تبقى مستعدة للوبا في أيتها الحظه، ومش بعيد الحكومة تخرج دفعه جديدة من الخانوتية بدري عشان تخلص.

الحقيقة أنا من هنا أحبي الفكر الغير تقليدي للحكومة خصوصا إننا ناس مؤمنين وعارفين إن الميت بالأنفلوانزا يبقى شهيد وكلنا هنموت هنموت دي كلها أسباب وأعمار يا جماعة.. يبقى نستعد بقى لما بعد الوفاة، هو إحنا لسه هنعالج ؟

ما يهمني هنا هو إذا جاء العام القادم حاملاً معه أنفلوانزا
الخيول فهل سنبذبح كل الخيول ؟

وإذا جاءت الأنفلوانزا الآسيوية فهل سنبذبح كل الصينيين
الموجودين بالبلد ؟

رأيت أن نترك الأنفلوانزا في العالم كله تنتشر كوباء ليُدمر
نصف البشرية كما توقع البعض .. حتى يعيش النصف الآخر
بسعادة ورخاء بما سيتركه النصف الميت من ثروات .

ماهو محدش بياخذ حاجه معاه والكفن مالوش جيوب .
بس يارب أبقى من النص اللي هيعيش !!

هل أنت متصلة مع نفسك ؟

موضوع عميق ..

سؤال محير جدا فعلا.. مفيش مره كده وأنت مسافر مثلا
في مواصله والطريق طويل.. أو وإنت قاعد في البلكونه ساعة
عصاري - علي اعتبار إنك من النوع اللي يقعد في البلكونه
ساعة العصاري - أو حتى وأنت في الحمام .. المهم أي مكان
بتقعد فيه وتتأمل حياتك مفيش مره كده سألت نفسك السؤال
ده؟ هل أنا متصالح مع نفسي؟ يعني لما بتغمض عينك بتلاقي إن
جواك حلو؟ ولا بتلاقي جواك حاجه ثانيه خالص غير اللي أنت
كنت بتتمناه ؟ الموضوع مش موضوع حققت أحلامك ولا
عملت اللي كان نفسك فيه.. لا .. دي نظره سطحيه
للموضوع.. لكن النظرة الأعمق مش مهم فيها إذا كنت
حققت حاجه من اللي كنت بتتمناها وأنت أصغر شويه ولا
لا.. لكن أنت ونفسك متصالحين؟ حاسس إنك مش منافق؟؟
جواك حاجه ومع الناس حاجه ثانيه. حاسس إنك راضي عن
حياتك زى ما هي كده، وشخصيتك زى ما هي كده رغم كل
الإحباط وخيبه الأمل اللي كل الناس فيها اليومين دول ؟

راضى عن ذاتك.. عن أفعالك .. عن صفاتك وطريقة تعاملك مع أي حدث مهما كان كبير أو صغير .. عن علاقتك بالناس .. الكويسين والوحشين في حياتك .. عن الطريقة اللي بتمارس بيها مسئولياتك.. عن الطريقة اللي بتعالج بيها مشاكلك بصرف النظر عن النتيجة .. هل أنت راضى عن الشخص اللي بتغمض عينك وتشوفه نائم هنااااااااااا في أعماق أعماقك .. ؟ ولا بتتخاف مع نفسك طول الوقت ومش راضى عن حاجات كتيره بتعملها ومش عارف تبطلها؟؟ سؤال عويص جداً وإجابته صعبه ويمكن تاخذ مننا أيام عشان نعرف بنجاولها.

أيام السنة مقسّمه إلى أيام عاديه، وأيام روحانية ليها تأثير روحاني كبير على الإنسان زى رمضان والأعياد وأيام الجمع، وده على فكره مش كلامي ده كلام دكاترة في علم طاقة الإنسان.. ده غير الطاقة بتاعت المحركات والبترول والحاجات دي - طاقة الإنسان دي هي المحرك الأساسي لحياته .. يعني أحياناً الواحد لما يكون مكتئب يصحى من النوم الصبح مش قادر يقوم من السرير ولا قادر ياكل ولا يمشي ولا عنده القدرة إنه يقوم بأي عمل حتى الحاجات المهمة بتصبح غير مهمة تماماً عنده .. والطاقة الروحية دي ممكن إعادة شحنها بسهولة عن طريق حاجات كتيره أولها وأهمها طبعاً التمسك بالدين والتواجد في أماكن العبادات زى الجامع والكنيسة .. وأيضاً عن طريق الحب والمشاعر الإيجابية السعيدة . لكن اللي يهمنا

هنا هو إتنا وإحنا خارجين من رمضان دلوقتي هل إحنا فعلاً متصالحين مع نفسنا ؟ يعني حاسين إتنا استفدنا من الطاقة الروحانية الهائلة اللي كان المفروض إتنا ناخذها من شهر رمضان؟ ولا قضيناه زى أي شهر والسلام، ولا قضيناه أسوأ من أي شهر.. يعني نوم وزهق وعصبيه وأكل كثير وحلويات وسهر وخيم رمضانة و عزومات و خلاص ؟

مهم جدا إن الإنسان يكون متصالح مع نفسه في كل وقت رغم إن ده مش بيحصل طبعاً لأن أصعب شيء في الدنيا إنك تكون متصالح مع نفسك .

عشان كده لازم ننتهز أي فرصة ونقعد مع نفسنا ونحاول نتصالح ..

ولو ماقدرناش ممكن نوسط حد كبير في الموضوع .

صباح الخير .. صباح النور ..

وكما يقول صباح النور ..

زبيبيووووو ..

أحنا ليه متحفزيه لبعض قوي كده؟

اركب أي ميكروباص وشوف الناس بتعمل إيه أصلاً عشان
تركبه .. كل واحد عايز يخلع عين الثاني عشان يعطله ويركب
هو الأول .

امشي في أي شارع وشوف الزحمة بتعمل إيه في الناس كل
واحد عايز ينط في كرش الثاني من غير أي سبب، ومن غير أي
سبب برضه ممكن تلاقي اللي بيتخانق معاك لأنك خبطته أو
بصيت له نظره معجبوش .

شاور لأي تاكسي كده وشوف لو وقف لك .. لو يعني
حن عليك واستنصفك ووقف لك وقلت له رايح في الحته
الفلاية حايبص لك من فوق لتحت ويقولك لا مش طريقتي ..
هو أنت قطر يا عم .. آمال طريقك إيه بس .. وكأنك غلطت
في البخاري لما قلت له وديني هناك ..

ادخل أي محل تتفرج علي أي حاجه .. تلاقي البياح لسرق
لك كأنك حتفسد الحاجة دي بمجرد نظرتك ليها ويفضل
يتكلم يتكلم لحد ما يزهقك في عيشتك ومصيبة بقي لو أنت
ملاقيتش الحاجة اللي أنت عايزها وقررت إنك تمشي من غير
ما تشتري .. يبص لك من فوق لتحت وممكن يدبك كلمتين
يسموا بدنك وكأنك غلطت برضه في البخاري وكان لازم
إنك تشيل أي حاجه هو يشاور لك عليها وخلاص قلبه أدب
منك يعني إنك تخليه يفرجك على الحاجة وبعدين تمشي من غير
ما تشتري .

افتح الباب لأي واحد يباع يخبط .. ويعرض عليك
حاجه.. مش حاتقدر تفلت منه .. حايفضل يلك لحد ما
تضطر إنك تشتري منه أي حاجه عشان تخلص منه ولو سمعته
بس و ما اشتترش حاجه تبقي وقعتك سودا وهشارك مش
فايت.. حايرمي الحاجة ويشتمك .

جرب كده إنك تروح سينما - لو معاك فلسوس يعني -
ادخل كده واقعد في الكرسي اللي أنت حاجزه وشوف
تعليقات الناس وكل واحد عايز يقطع راس اللي قدامه عشان
يشوف هو كويس.

اخرج بالليل في الشارع واتمشي كده وشوف كام خناقه
ممكن تعدي عليها في أي شارع سواء عشوائي أو راقسي ..
حتلاقي البواب بيتخانق مع الساكن والسواق بيتخانق مع
الراكب والست بتخانق مع عيالها والراجل بيتخانق معاهم
كلهم .. كل ده بيزيد كمان في رمضان أكثر من أي شهر في
السنة بحجة إن الواحد صائم وروحه في مناخيره .. طيب اوعى
تعطس بس أحسن تطلع ..

طيب والحل إيه يا جماعه في الخنقه دي ؟؟ كل الناس
متحفزة لبعض وعازين يتخانقوا مع بعض ..

ما تيجوا نعد من واحد لألف وخمسميه لما نلاقى نفسنا
عازين نتخانق أو نتنرفز .. يمكن لما نركز تفكيرنا على حاجه
تانيه غير الخناق والترفزه نروق ويروح العصبي اللي عندنا ..

طیب

[illegible]

أهم حاجة في الدنيا أنك تكون مستريح مع الموبايل
بتأكله
وبعدك الناس بتروح وتيجي المغم الموبايل .

إيه رأيك إن الموبايل دلوقتي أصبح أهم حاجة في حياة الإنسان .. يعني تعالو نفكر كده إيه أول حاجة كل واحد فينا بيعملها ع الصبح أول ما يفتح عينيه .. كل الناس تقرّيا بتفتح الموبايل " لآن كل الناس تقرّيا بقي عندهم موبايلات " مش بس عشان تشوف ميسداقها ورسايلها . لا وكمات ناس بتفتحه عشان تشوف الساعة كام دلوقتي .

وزي كل زمن .. الموضة بتتغير يعني زمان كانت الشياكة باليدله المكوية والطربوش وبعدين بالعربية السبعة متر اللي بتسد الشارع وبعدين بالهدوم السينية الماركة المعروفة يعني وبعدين بوجود الدش .. وبعدين دلوقتي بقي بقت الشياكة في الموبايل .. شكل الموبايل .. سعر الموبايل لون الموبايل .. إمكانيات الموبايل بيسجل ولا لا .. فيه كام كاميرا .. فيه فيديو ولا لا فيه إنفرا ريد ولا لا فيه بلوتوث ولا لا .. بيتغير كل كام شهر ؟ .. حاجات ماكانش الواحد يفهمها ولا يتخيلها أبدا لولا ثورة التكنولوجيا الباهرة التي اخترقت عقل الشعب المصري وخلته يفهم في كل حاجة .. وخلته كمان

يُخترع حاجات الناس اللي عملوا الموبايل نفسه عمرها ما
فكرت فيها زى الميسدات مثلاً وحكاية اطلبني شكراً .

والناس أذواق في مصر والعالم كله يعني اللي ماشي في مصر
مش لازم يكون هو اللي ماشي في كل حته في العالم إحنا هنا
لنا رأي خاص في أنواع الموبايلات لازم الموبايل يكون زى
العربية جامد ومتين وبأربع عجلات كمان يعني .

ويمكن إحنا البلد الوحيدة في العالم اللي ممكن تلاقي الواحد
فيها شايل أكثر من موبايل في نفس الوقت قال يعني من شدة
أهميه الشخص شايل أكثر من نمره .

والغريب إن الموبايل بدأ الأول للناس المهمة فعلاً يعني رجال
الأعمال والأطباء وغيرهم ودلوقتي بقي موجود في إيد كل من
هب ودب حتى إن واحد من إعلانات الموبايلات في التلفزيون
بيقول مش عايزه موبايل رخيص لابنك أو بنتك اللي في
المدرسة عشان تطمّني عليهم ومع الكلام صورته لبنت وولد في
الابتدائي . ورغم إن مخاطر الموبايل معروفه جداً وفي العالم كله
بيحاولوا يبعدوه عن الأطفال إلا إننا بنشتريه لهم هديه نجاحم
ورمز لثروة الأب ..

واللي يغيظ إنك ممكن تلاقي ناس مش معاها فلوس ومع
كده بتجيب فلوس الشحن والكروت ومقضيهاها ميسدات على
طول .

واللي يفيظ أكثر إنك ممكن تقعد تحوش تلت سنين عشان
تجيب موبايل جديد حديث وتلاقي بعد كده ابن البواب ولا
بتاع السمك شايله.

وبعدين يعني العلاقات الإنسانية دلوقتي بقست في النازل
بسبب الموبايل يعني الواحد بدل ما يروح يطمئن على حد عزيز
عليه يزوره بقي يكلمه ويطمئن وخلاص بالموبايل وكمان ممكن
يرتوا لبعض وخلاص خصوصاً لو كانوا بعيد عن بعض قوي .
وبعدين الموبايل علّم الناس الكذب يعني ممكن واحده تتصل
على حبيبها اللي أتأخر عنها ويقول لها أنا في الطريق يا حبيبي
وهو يكون لسه في البيت مانزلش أو مع واحده تانيه ..

وزى ما كل واحد فينا حر في رنته كل واحد فينا برضه
حر في موبايله يدلعه زى ما يحب .. يجيب له دلاديل وفليشات
ووشوش كل حاجه .. ماهو بيني وبينكم الناس بتروح وتيجي
المهم الواحد يكون مستريح مع موبايله هو ده أبقى له .

إتاني تعرف إيه الشخص اللي بتحبيه ده هو نفسك

النتيجه؟؟؟؟

أقولك يا ستي..

1
2
3
4

5

6
7
8

من زمان كان فيه ناس أعتقد إنهم الإغريق بيقلولوا إن
الإنسان في الأصل ماكانش راجل وست دول كانوا كيان
واحد يعني شخص واحد وبعدين اتقسم نصين نتيجة لعنة ما
وكانت اللعنة إن كل نص يعيش طول عمره يدور علي النص
الثاني ويأما يلاقيه يأما مايلاقيهوش وعشان كده دائما نقول
للشخص اللي حايتجوز.. أنت لقيت نصك الثاني .

وكمان فيه ناس بتقول إن كل إنسان له شريك في الحياة
واحد بس اللي كيميته متوافقة مع كيمية الإنسان يعني لو
شبهناها بالمغناطيس كده يبقى إثنين لما يلاقوا بعض مايقدروش
ينفصلوا عن بعض مهما حصل.

طيب في أوروبا والدول المتقدمة الناس هناك مش بتتجوز
كده بالساهل لا دول لازم يفضلوا يدوروا بالسنين علي
الشخص ده وإذا مالقيهوش خلاص يفضلوا من غير جواز
ويقضوها بوي فرندات، وخلاص!

طيب عندنا إحنا في الشرق طبعاً الوضع ده مرفوض ده فيه
بنات وشباب بيتجوز بس عشان مايقولوش عليهم إنهم عنسوا

مش مهم بقي النص الثاني ده مناسب ولا وحش مش مهم إنه بيختار إزاي على أساس الشكل ولا الموضوع ولا الطين (فيه شباب بيحب يتجوز بنات عندها طين يعني مريشه والعكس بالعكس).. لكن في قواعد لاحظها الناس اللي بتفهم في كل الدنيا لو فكرنا فيها شويه حانلاقيها صح زي مثلاً إن الطفل الأول في أي أسرة (البكري يعني) دائماً يتجوز الطفلة الأخيرة (آخر العنقود يعني) في حين إن الأطفال اللي في الوسط بيتجوزوا من بعض بنفس الترتيب.

ما علينا إحنا جايين النهارده نتكلم في موضوع ثاني خالص وهو ازاي تعرفي يا بنتي إن الشاب ده هو نصك الثاني ؟

أولا الحب ده أنواع يعني فيه نوع بيطلق عليه الغرب (الكراش) المزه تقوله أي هاف أ كراش أون يو i have a crash on you) يعني زي الحادثة كده مش أنا ببحبك لا أنا خبطت فيك.. قلبي خبط في قلبك والتسمية دي غالباً جايه من إن الواحدة بيحبلها كرشة نفس لما تشوف المزر بتاعها.. ويقعد قلبها يدق جامد كأن فيه مزيكا حسب الله السادس عشر والإيديين تترعش والواحدة تعرق وتتلخم وتبقي زي العبيطه. وده غالباً حب مش مضبوط ليه بقي ؟ لأن الكراش ده معناه من غير عقل حاجه كده زي القضاء والقدر يعني واحده لقت واحد وسيم وواحد باله من نفسه وكل البنات حاتموت عليه وهو ثقيل قوي تقوم تسورق لو كلمها ويحبلها كرشة النفس.

وفيه نوع ثاني من الحب وهو الحب الهادي المبني على طول الأيام والسنين يعني يكبر ويتزعرع مع الأيام ومع العشرة وده الحب التقليدي العادي بتاع الجواز التقليدي العادي .

وفيه حب اسمه الافتتان، أو الاستحواذ يعني شخص واحد يستحوذ على تفكيرك كله وتكوني مفتونة بيه وماتشوفيش فيه أي عيب رغم إن ممكن يكون كله عيوب لكن لما حد يقولك عليها تقولي وماله مانا حاخليه يتغير ويفضل الشخص ده مستحوذ علي تفكيرك طول الوقت لكن متعرفيش عنه حاجه وهو بعيد عنك لحد ماتشوفيه وعمره مابيتغير وتفضل عيوبه زي ماهي وممكن تزيد كمان لما ترتبطي بيه كأنك كنتي عاميه وفتحتي...

لكن اللي أنا أقصده هو الحب المجنون يعني اللي بيدأ بموقف مجنون ويكبر بمواقف مجنونة يعني مثلاً واحده تقابل واحد لأول مره لكن فيه حاجه جواها تقولها إن هو ده... حاجه من جواها كده مش عارفه هي إيه تقولها هو ده نصيبك... أنا شفت مره فيلم هندي لأميّاب طبعا كل ما صاحبه يسأله أنت مابتجوزش ليه يقوله حبيني اللي حابتجوزها دي لازم اسمع أجراس بتدق في مخي أول مره أشوفها ساعتها حاعرفها على طول.. وهو ده اللي أنا أقصده إنك لما تشوفيه لأول مرة تحسي مش قلبك بيدق بقي والحاجات الهبله دي لا كأن الدنيا فجأة نورّت أو بقي لها شكل ثاني... طبعا لأن كثير قوي من الناس ماجربش الموضوع ده فحيقولوا إيه الكلام الفارغ اللي بتقوله

ده لكن ده يجد مش كلام فارغ فعلاً الواحدة بتلاقى النص
التاني كده ... فجأة تشوفي واحد تلاقى فيه حاجه في محك
ضربت مش ضربت يعني اتجننتي لا ضربت يعني اتفتحت زي
ماسورة المجاري كده ما تضرب وتغرق الدنيا وتلاقى حاجه
تانيه بتسيطر علي تفكيرك وتدفعك ليه... مش عارفه تستغني
عنه ولا عارفه تبطل تفكير فيه حاسه إنه معاك في كل لحظه
حاسه بيه فعلاً جنبك مش في خيالك

ومع مرور الوقت والارتباط اللي بينكم بتلاقى نفسك
بتفكري زيه وتكلمي زيه وكل حاجه بينكم بقت مشتركه
حتى الحاجات اللي كانت نقط خلاف بينكم ماعدتش مهمه
المهم هو إنه يكون مبسوط زي ما هو أهم حاجه عنده إنك
تكوني مبسوطه ودائماً تسامحه مهما عمل فيكي لأنك عارفه إنه
مش قاصد يجرحك ولما يكون غايب عنك بتكوني دائماً عارفه
هو فين بإحساسك ومطمئنه عليه حتى في أصعب الظروف لأن
بين قلبك وقلبه علاقة مش مفهومه يعني ممكن تقريره ممكن
تغمضي عينيك وتعرفي هو فين في الضلمه (ممنوع الضحك)
يجد أنا باتكلم على علاقة نادرة يا جماعه مش كل إثنين حتى لو
متجوزين عن حب عاشوها باتكلم عن الحب لدرجه السذوبان
مش حب الكراش أو الافتتان أو التقليدي لا ده حاجه أكبر من
كده بكثير جداً باتكلم عن أحمد، ومنى.. عارفين أحمد، ومنى
اللي انكرت نفسها عشانه وهو مع أسرته وفي نفس الوقت
إذاها كل حبه وحنانه وعوضها عن الأم والأب والأولاد؟

يعني فعلا لو غمضتي عينك ممكن تعرفي هو فين ويعمل إيه
في اللحظة دي حتى لو كان على بعد مئات الأميال عنك زي
مايقولوا وده بقي لما ترتبطي بيه مش حايكون مهم أي
مشاكل في الحياة يعني أي حاجه تهون مادام إنتم مع بعض
وكمات كل الطاقة السلبية اللي في مخ كل واحد فيكم تتحول
لطاقة إيجابية لما تكونوا مع بعض يعني مهما كان زعلان أو
أنت زعلانة ومتضايقه مجرد تليفون تلاقى نفسك أحسن بكثير
.. يعني م الآخر بتكمّلوا بعض. مفيش أي حاجه ممكن تأثر في
أعصابك مادام هو معاك كل السعادة اللي بتسمعي عنها في
القصص والروايات الخيالية حتلاقيها معاه .. الحب بينكم مش
حينتهي أبداً مهما عدت عليكم سنين، والرومانسية حتفضل
بينكم طول العمر وحتى بعد ماتموتوا حتفضلوا تحبوا بعض ..

طيب وبعدين لو أنت من الناس المحظوظة اللي اتكتب لها
إنها فعلا تلاقى النص الثاني تعملي إيه بقي ؟ عاوزه نصيحتي...
اهربي ... اهربي منه علي آخر ما عندك سبي له البلد بحالها لو
قدرتي صحيح مش حاتقابل واحد تاني في حياتك تحبيه زيّه
ولا تحسي معاه الأحاسيس دي أبداً لكن في المقابل لو ارتبطتي
بيه فعلا حاتلغي شخصيتك نهائياً وكل أحلامك وطموحاتك
حاتنتهي خالص وحاتكتفي بأنك تعيش جنبه وهو كمان مش
حايكون مهم أي حاجه ولا أي حد ف الدنيا غيركم إنتم
الإثنين ومافيش أي حاجه حاتأثر ف العلاقة اللي بينكم مهما
عمل فيكي أنتي راضيه مادام هو معاك مهما الأيام عملت

فيكم برده راضين مادمتم مع بعض (ده إيه الملل ده)!! حايجي
عليكي لصالح أهله لكن أنتي مش حايهمك لأنه أكيد
مايقصدش ده بس كلام من ورا قلبه .. الدنيا حائظ لو زعل
منك والشمس حاتطلع لو صالحتيه .. إنتظارك ليه هو أهم
حاجه بتعملها كل يوم لو اتفرغ شويه .. ضغطك أنت يعلو لو
ضحك كثير .. أنت تقولي اللهم اجعله خير يقي عليكي من ده
بإيه دانتي مش حاتعرفي تزعليه أبداً وحياتك كلها حايكون هو
محورها .. أسعد لحظات حياتك لما تدخل المطبخ تعملي له
حاجه بيعجبها أو لو خرجتي تشتري أي حاجه أول حاجه
تشتريها الحاجة اللي هو عايزها باختصار هو حايكون كل
حياتك حتى ولادك منه لو اتجوزتوا مش حايكون لهم نفس
أهميته عندك ولا شغلك ولا أي حاجه ولو ماتجوزتوش مش
حاتفكري عمرك غير فيه وحاندوري عليه في أي راجل تقابليه
ومهما قلتي أنا مش حاجه قوي مش حاتقدر يقي نصيحة
من مجرب على إيه وجع القلب ده ابعدني عنه أحسن ..

أقولك قدّمي علي هجره كندا !!

هو الراجل حايخسر ايه لو قال لماته ذات صباح :
بحبك .. وحشتيني ؟

"صباح الخير يا حبيبي .. عامله إيه ؟ غثي كويس
امبارح؟ " أو.. " صباح الخير يا حبيبي وحشتيني قوي "

طبعاً أي واحد في مصر عارفه إنها مش ممكن تسمع الكلام
ده من حبيبها أو جوزها أبداً ... ولا حتى بعد ميت سنه
جواز. وطبعي إن بعد ميت سنه جواز مش حا يكون فيه حيل
ولا نفس يقول أي حاجه من أصله بس أهو مجازاً يعني.

نفسى أسأل كل الرجالة: "يا كل رجل في جمهورية مصر
العالمية... هو أنت حاتخسر إيه لو قلت لمراتك أو خطيبك
كلام حلو من عينة بجمك وحشتيني؟"

تعالوا نتكلم بصراحة عن الفرق بين مشاعر الراجل
والست..

يا جماعة مشاعر الست هي كل حياتها وبكلمة حلوة تاكل
عقل الواحد .. عارفين إيه الفرق بين الراجل والست في
موضوع المشاعر ده؟؟ لما تبقى فيه أزمة في حياة كل واحد

فيهم.. نفس الأزمة ..الكلمة الحلوة الرقيقة تخفف عن الست
الأزمة لكن عند الراحل ما تفرقش معاه ويمكن تروّد الأزمة..

المفروض الراحل لما يحب.. يقول لحبيته كلام حب رقيق
وهو ياخذ منها مشاعر بالهبل وبعدين يعني حتى لما الواحد أيام
الخطر.. يقول كلام حلو - إذا كان يقول وده نادر - له بعد
الجواز يبطل وكأنه خلاص بقى تحصيل حاصل واتجوزها
وخلّاص مع إن الصبح إن الكلام الحلو يزيد بعد الجواز لأن
العلاقة بعد الجواز أصبحت أعمق وأطول وأعقد كمان
ويتصبح حاجه مملّة جدا.. وفي حاجه بقى لازم الراحل يعرفها
إن الست بتجوز عشان تحب مش بتحب عشان
تجوز! وبعدين يعني إيه اللي يخلى الست تستحمل مرطه في
شغل البيت وشغل بره البيت وبعدين حَمَل وولادة ومهدله
والم.. طبعاً العاطفة.. إنها تبقى أم وتعمق الارتباط بالراحل
اللي بتحبه بطفل يربطهم طول العمر .

مش حاقولكم الراحل في أوروبا والدول المتقدمة بيحيب
ورد لمراته وهو راجع البيت - هو إحنا أصلاً لاقين ناكل
عشان نجيب ورد - ماشي مش لازم الورد ممكن كلمه حلوه
تبقى أحلى من الورد وأحلى من كيلو لحمه كمان لأن الجواز
أصلاً كلاكيع من غير حاجه ونظام معقد ومتعب للطرفين
يبقى لازم يكون فيه حاجه تخلى الطرفين يستحملوا
بعض... كلمه حلوه رايحه جايه بينهم زي كرة البينج بونج
كاد وبعدين يا أيتها السيدة التعبانه المنتظرة كلمه حلوه من

جوزك ماتبصيش للرجالة اللي في التليفزيون وتقولي: " أنت ليه
مش بتقولي كلام حلو كده؟". لأن الرجالة دي بتبقى واحده
فلوس على التسييل ده ومش بيبقى ده كلامهم كمان ده
سيناريو حافظينه وكلام مدفوع فيه فلوس .

لكن لو أنت عايزه تسمعي منه كلمه حلوه تمز مشاعرك من
جوه غير كلمة مرجحه ببقى أنت ابدأي بيها الأول وغرقيه
في فيضان من مشاعرك الحلوة لحد ما يستغيث .. مش لازم
المشاكل تبدأ لما تشوفيه . لازم يكون لكم وقت رومانسي
خاص تستعيدوا فيه ذكريات الحب الملتهية بتاعت زمان أيام
الخطوبة يعني تخرجوا شويه بالليل تقعدوا مع بعض في البلكونه
ساعة عصاري مش مهم ورد وشمع وكلام من ده .

وبعدين يا عزيزي الراحل أنت لو قلت لها كلمه حلوه
حاتعمل لك كل حاجه أنت بتحياها وتبقى نفسها مفتوحة
وهي واقفة في المطبخ بتطبخ لك وأنت عايز إيه أكثر من كده
بقي؟ وكل ده بحاجه بسيطة خالص ..

بحبك وحشتيني .

شفت ازاي زي شكة الإبرة !!

خاف إيه أحسنه ثلاث حاجات ف الدنيا ؟
حاجتيه .. حاجة البالد و بهه
هو إحنا ليه ما بنضحكش زي زمان ؟

أولاً سأمحوني علي الأسئلة الكثيره اللي مالهاش إجابة بس أنا
باحب كل واحد فينا يفكر بعد ما يخلص قرايه.

سألت نفسك السؤال ده زبي ولا لا ؟

إحنا ليه ماعدناش بنضحك زي زمان ؟ وزمان ده محسيري
قوي .. بجدا!!

هل زمان ده معناه العهد اللي فات؟ يعني الستين الطويلة
السابقة للسنين دي. أيام ما كان جوز الحمام ثلاث فرد والميت
بيضه بجنيه وتاخداهم ميه وعشره ..

يعني أيام الحكومات الكثيره السابقة للحكومات دي. ؟ لما
كان عدد أفراد الشعب صغير والخير كثير والقناعة موجودة
وكل حاجه فيها البركة. حتى الوقت ؟

ولا زمان ده معناه وإحنا صغيرين وخلاص. ومش فاهمين
حاجه في أي حاجه ولا بتتفرج علي نشرات الأخبار . ولا
بنقرا جرايد الحكومة والمعارضة ؟.

يعني هل كل ما الواحد بيكبر ف السن بتضيع منه الضحكة
الصافية ولا السنين السودا اللي إحنا عايشينها هي اللي
ضيعتها؟

نبدأ م الأول لو شفت طفل صغير عنده تلت أربع سنين
تلاقي حاجات بسيطة قوي تفرحه لعبه .. حلويات ... هدم
جديدة .. فسحه حلوه . لعبه جديدة . مراجيح .. تخيل نفسك
أنت بقى في السن اللي أنت فيه ده ممكن تفرح لو ركبت
مرجيحه؟ أنا عارفه طبعا إنك لو كلت حبة جساتوه كبيرة
بالشيكولاته والبندق وعلي وشها كريز وأناناس حاتكون
مبسوط جداً خصوصاً لو كنت عامل ريجيم قاسي ومحروم
بقالك مده... لكن باقي الحاجات دي حاتفرحنا فعلاً الهدوم
الجديدة ولا الفسحة ولا اللعبة الجديدة؟ يعني هل لو الواحد
مكتتب شويه تقوم فسحه حلوه تخرجه من اكتتابه ده ؟

طيب لما الطفل بيكبر شويه ويبقى عنده ١٣ - ١٤ سنة
ويدخل في طور المراهقة - سموها طور عشان الواحد بياكل
ساعتها زي الطور - إيه اللي بيخلي اللي ف السن ده يفرح ؟
الكمبيوتر والألعاب والنترنت والموبايل الحديث اللي بيلفت النظر
والخروج مع أصحابه والتعرف علي بنات ؟

طيب بعد كده نفس الحاجات دي بتفضل تفرح الإنسان
ولاً خلاص النت بيتقدم ومجته بتروح وخلاص الواحد بيمل
منه؟

طيب في سن الشباب بقي يعني حاجه بتاعت ٢٠ - ٢٥ سنه إيه اللي بيفرح ؟ الحب.. الدراسة والنجاح فيها ؟ التخرج من الجامعة ؟ ولا الدراسة عموما هي سبب الإحباط الرئيسي في السن ده.. أنا فاكروه وإحنا في الجامعة كنا حاسين إننا حتخرج هذ الدنيا لأننا مش عادييين إحنا أحسن من كل الناس بكل حاجه ولما أخرجنا للأسف لقينا الإحباط منتظرنا زي كل الخريجين اللي سبقونا واللي جم بعدنا.. واكتشفنا إننا مش حانقدر نغير أي حاجه لأن م الآخر...مفيش فايدة .

طيب وبعد كده في سن الشباب برضه يعني ٣٠ فما فوق.. إيه اللي يسعد الشاب .. الخطوبة، الجواز، والاستقرار، وعمل الأسرة - لاحظوا إننا بتتكلم عن ناس المفروض إنهم طبيعية يعني يا دوب كده سن الجواز ومافيش بطالة ولا نيله - ولا الأسرة والمسؤوليات دي هي اللي بتمنع الإنسان من السعادة ؟ يعني لو واحد متجوز في السن ده وواحد مش متجوز مين فيهم حا يكون أسعد من التاني؟ اللي عنده مسؤوليات، وأولاد، وعایش حياته في استقرار ولآ اللي بياكل أي حاجه ويعمل اللي هو عايزه.. وبعد السن ده. يعني في الأربعينات كده وعليك خير إيه اللي بيفرح ؟ نجاح العيال ونجاحه هو شخصيا على اعتبار برضه إننا بتتكلم عن ناس طبيعية اتجوزت وعندهم عيال وشغل ثابت.

طيب بعد كده في سن الخمسين - لو وصلنا بقي للسن ده من غير مرض - أكيد نظرنا للحياة اتغيرت بقي وللسعادة

كمان يعني مش الأكل ولا الفسح ولا البنات ولا العلاقات
بقي ولا نجاح العيال.. أمال إيه بس ؟ يمكن ساعتها عدم
وجود أمراض هو يكون سبب السعادة وجواز العيال
واستقرارهم - رغم إنهم بيكرروا نفس غلطاتنا - بعد كده
بقي في الستين من العمر .. أعتقد إن راحة البال بقي هي
السبب في السعادة

وفي السبعين والتمانين كمان وما فوق - عادي - راحة
البال هي أهم أسباب السعادة وراحة البال دي بتيجي من
الرضا عن النفس يعني لما الإنسان يرضي عن مشوار حياته كله
بداية من التعليم والشغل والجواز والسكن والعيال وكل
حاجه.. عرفتوا بقي إحنا ليه مابقناش بنضحك زى زمان ..
لأننا مش راضيين عن أي حاجه .

تخيل لو بإيدك تبع البعد في أهد بعد بعيد حه بعدنا
خالصه..

وليكه البعد الواوي...
حياتنا حيكوه شكلها إيه؟؟

من خمستاشر سنة.. كنت في ألمانيا.. وهناك شفت فيلم
كرتون قصير .. بس عيقرى.. كان معروض في مسابقه وواخذ
الجايزة الأولى ..

بدأ الفيلم باستعراض لحديقة جميلة جدا.. وفراشة تطير من
زهرة لأخرى.. وفجاء.. ظهرت فحوة سوداء صغيرة
.. حجمها أكبر من حجم كرة القدم بشويه.. في وسط الهواء
ابتلعت الفراشة ولم تظهر من الناحية الثانية... وبعد لحظه..
ظهر طفل صغير يلعب بكرة.. ونطت الكرة بعيد عنه ودخلت
الفحوة ولم تظهر!!، وبعد لحظه.. جاء رجل يلعب مع كلبه
ويرمي له عصايه والكلب يجري يجيها له.. وبعدن العصايه
دخلت الفحوة أيضا... وهنا.. بدأ الناس ياخذوا بالهم من
الفحوة وجات الشرطة.. وعملت كردون حول الفحوة
الصغيرة وأقاموا حولها خيمة.. وجاء العلماء من كل مكان
يفحصونها وقيسوا أبعادها وارتفاعها.. ويحاولوا يمرروا من

خلالها أي شيء.. لحد ما اكتشفوا أنها فتحة بتودي لبعد ثاني
غير البعد الموجود فيه حياتنا علي الكوكب ..

ثم أقاموا حولها مبني ضخيم مكتوب عليه سري للغاية وبدأوا
في إلقاء كل المخلفات السامة علي ظهر الكوكب فيها..
سيارات نقل ضخمة تأتي محملة ببراميل مرسوم عليها علامة
نفايات نووية سامه... وأوناش تشيلها ترميها داخل الفجوة...
والكل سعيد جداً لأنهم استطاعوا أنهم يعدوا كل اللي مسبب
الضرر لهم إلى بعد ثاني بعيد جداً عن بعدهم .

طبعاً فكره جميله جداً .. إننا نجد الفجوة دي فعلاً.. ويكون
في إيدينا إننا نبعد كل شيء وكل إنسان بيأذينا إلى أبعد بُعد
بعيد عن بُعدنا خالص .. ويمكن نطلق عليه مؤقتاً.. البعد
الواوي!!.. مش مهم سبب التسمية إيه المهم إن البعد الواوي
ده حايكون هو الملجأ والملاذ لأهل الأرض من كل شر ..

تعالوا نتخيل كده.. يعني لو عندك البعد ده.. بالفتحة دي
إيه أول حاجة حاترميها فيه ..؟ الفقر..؟ البطالة..؟ النفاق..؟
المحسوبية والواسطة..؟ المواصلات..؟

مين أول إنسان حاترميه فيها بطول ذراعك ومن غير ما
يصعب عليك ؟ رئيسك في الشغل ؟ ياااه دي تبقى حاجه
حلوه قوي .. كل واحد يرمي رئيسه في الشغل لحد مايفضلش
حد في أي شغل خالص ..

طيب وإيه هي المشاكل اللي حاترميها فيها وتتخلص منها
نهائيا؟ زوجتك النكديه ..؟ أو زوجك المستبد ..؟ مُدرس الولد
اللي عامل زى المنشار طالع واكل نازل واكل ..؟

وبالنسبة للدولة ككل .. مين أول واحد حاترميه فيها ؟
"بلاش السؤال ده" وإيه القوانين اللي حاترمي فيها ؟ وليه؟

ولو حصل فعلا ووجدنا فجوه زيها ورمينا كل حاجه
وحشه في الدنيا فيها .. يا ترى شكل الدنيا حا يكون إزاي ..
حاتبقى أحلي فعلاً من غير أي شر أو قبح ..؟ ولا لازم يكون
في شر عشان نحس بالخير .. ول لازم يكون فيه قبح عشان نحس
بالجمال .. يعني لو اختفت كل حاجه وحشه من عندنا .. هل
حاتختفي كل معاناتنا ولا حايطلع لنا ألف حاجه وحشه غيرها
تنكد علينا ؟

طيب ماحنا فيها .. هو لازم تظهر لنا فجوه من السما
عشان نتخلص من مشاكلنا كلها ؟ طب ماحنا ممكن نتخيل
وجود هذه الفجوة في مخنا ونحاول إننا نلم كل مشاكلنا اللي
مالهاش حل ونرميها كلها فيها ونحاول ننساها .. بس للأسف
إزاي الشاب ينسى إنه عاطل من ساعة ما تخرج م الجامعة ..
وإنه معندوش أمل يتجوز ويعمل بيت وإزاي البنت تنسى إن
سنها بيكبر من غير متلاقي الإنسان اللي يحبها وتعمل معاه
أسره لأن م الآخر مفيش فلوس للشباب يتجوز هما لاقين
ياكلوا لما يتجوزوا ولا إزاي الإنسان ينسى كبده المريض ولا

كليته المعطلة اللي مهما يغسلها مابتنصفش أبدا .. وحاجات
تانيه كتير .

خلاص بقى الفجوة دي تروح لناس غيرنا مشاكلهم ممكن
يرموها فيها بجد وإحنا ربنا يتولانا ولا أقولكم ... ممكن إحنا
نرمي نفسنا في الفجوة دي وخلص عشان نتخلص من
مشاكلنا المزمنة اللي مالهش حل . ولا عشان المشاكل المزمنة
هي اللي تتخلص منها .. ولا عشان اللي بيصيبونا المشاكل
المزمنة دي يرتاحوا منها .

بس المشكلة بقى أحسن تطلع أنت من إخوانا البعدا اللي
الكل نفسه بيعدهم عن بعدنا ده .. ساعتها حساتروح في
داهية ... بعد تاني بقى يا ترى حا يكون فيه إيه ؟ عسدر ولا
حبيب .. ؟

طبعا لو الفجوة دي وقعت في إيد أي حكومة تبقي مصيبة
سودا .. يبقى كل المعارضة حاتروح في الباي باي ... وكل
المعتقلين السياسيين وكل اللي يقول لا حا يترمي على طول
هناك في الفجوة السوداء ... ودي بقى اللي ممكن نقول عليها
ورا الشمس بصحيح ..

لكن المشكلة بقى إن الواحد بعد ما يبعد كل البعسا دول
ما يكونش عارف هو في أي بعد منهم .. أنا شفت مره من
زمان لقطه من فيلم مصري مش فاكره اسم الممثل بس هو

الممثل بتاع أنا عندي شعره ساعة تروح وساعة تيجي .. برضه
في مستشفى مجانين ويقول لواحد :

" أنا كنت باقطع بطيخه بالسكينه وبعدين .. السكينه
وقعت مني جوا البطيخة .. قمت نزلت جوا البطيخة عشان
أجيب السكينه .. المشكلة دلوقتي إني مش عارف .. أنا .. بره
البطيخة ولا .. جوا البطيخة .."

وبعدين قعد يغنيها .. هو ووراه كورس من المجانين ..:

أنا ... بره البطيخة .. ولا .. أنا .. جوا البطيخة

أنا ... بره البطيخة .. ولا .. أنا .. جوا البطيخة

إحنا كمان حانسأل نفسنا ..: ياترى إحنا بره البطيخة ..
ولا إحنا جوه البطيخة ..

لكن نسيت أقولكم باقي الفيلم .. بعد ما كل النفائات
النوية والكميائية والسامة اترمت في هذه الفجوة الصغيرة
السوداء واستراحت كل الحكومات ... وأصبح الكوكب نظيفا
ونحاليا من أي تلوث .. تغير المنظر فجأة إلى جنينه جميلة جدا
تشبه جدا الجنينة الأولى ... وكل شيء فيها هاديء، وممتع
وفجأة ... ظهرت فجوة صغيرة بيضاء في الهواء حجمها مثل
حجم الفجوة الأولى تماما .. خرجت منها فراشه .. ثم بعد
لحظه خرجت منها كرة صغيرة نطت بعيد ... ثم خرجت منها
العصايه .. وانتهى الفيلم علي كده .. يعني م الآخر ... مافيش
مهرب من مشاكلنا نرميها من هنا تطلع من هناك وحتى لو

الفجوة دي في معنا برضه المشاكل حاتلف تلف وترجع لنا
تاني..

صح! يخرب بيت كده.

إعادة تدوير المطبوعة!!

عارفين إعادة التدوير.. أو الريساكيل وهي إن إحنا نعيد تصنيع المواد المتخلفة من الزباله ونعمل منها شيء مفيد.. بدل ما نرميها وخلص.. خصوصاً إذا كان المنتج المراد إعادة تصنيعه غالي.. أو ببسبب أي أضرار بيئية أو لا يتحلل طبيعياً زي بقايا الأكل وينتهي من الوجود تماماً .

والأمثلة على المواد التي تحتاج إلى إعادة تدوير أو إعادة تصنيع كثيرة منها مثلاً مخلفات البلاستيك ..زي الأكياس وزجاجات الشامبو والزيت.. ومخلفات الزجاج والصفائح وحتى العربيات القديمة بيتعمل لها دلوقتي إعادة تدوير وترجع عربيات تاني .. وغيرها .. ويتم إنتاج نفس الأشياء من هذه المخلفات فالبلاستيك مثلاً نعيد تدويره إلى زجاجات أخرى، وأكياس أخرى ولكن أقل جودة من الأولى، وهكذا.

إيه رأيكم لو عملنا لنفسنا إعادة تدوير... بكل الملل اللي إحنا فيه الآن .. وصلنا إلى نهاية الصلاحية وخلص اتخلفنا .. ماعدش متنا فايده - قال يعني كان فينا فايده قبل كده - إيه رأيك لو عملنا لنا كلنا إعادة تدوير؟؟

طيب لو حبيت تعمل لنفسك ريساىكل ..ياترى حاسس
إنك إيه دلوقتي ؟ .. يعني عريبه قديمه .. زجاجة زيت تموين ..
كيس كان محطوط فيه كشري .. زجاجة كاكولا ساقعة
ومتلجة في يوم حر .. صفيحة سمنه تعبانه مليانه مكسبات طعم
..ورقة جرنان ماحدش قراها واتلف بيها ..ساندويتش طفل في
المدرسة .. شراب قلم - لامواخذه - ملبوس في ميت رجل
قبل كده ..

لاحظو إن في حاجات ماينفعش فيها الريساىكل .. يعني
حاترمي حاترمي .. أما تروح مستوقدات الفول تتحرق
ونستفيد منها برضه ..أو تتحرق وخلاص وتسبب لنا في
السحابة السوداء والخنقة في الجو - يعني خنقة وانت موجود
وخنقة وانت ماشي .

إنت بقى مين في دول أو حتى حاجه جديدة خالص مش
فيهم .. ياترى سألت نفسك قبل كده هل إنت مفيد في حياة
الناس اللي حواليك حالياً .. ولا حايسفيدو منك أكثر لو
اتعمل لك ريساىكل .. ولا انت مش مفيد خالص حتى لو أعيد
تدويرك .

طيب لو أعيد تدويرك زي ما انت عايز .. عايز تطلع إيه
بعد كده يعني ترجع تاني نفس الشخص بنفس المواصفات
والوظيفة ولا تتزل درجه وتبقى حاجه تانيه تكون مفيدة للناس
تانيين خالص ..

طيب تحب يتعاد تصنيعك إزاي وفين.. في مصنع كبير
ويمكن عملاق ولا تحت السلم .. (لو كنت زجاجة بلاستيك
مثلا ممكن يشطفوك ويكسروك وتتخرز يعني تتقطع تحت
صغيره قوي وترجع ثاني تتصنع بس ساعتها حاتبقى أكياس
سودا وريحتك - لامواخذة برضه - وحشه.. أو ممكن يحطو
عليك فانيلا للتمويه).

ولا لو انت حته زجاج كبيره مثلا ممكن يتقطع منك تحت
صغيره تتعمل أي حاجه .. براويز مثلا ..

طيب بعد اعاده تدويرك لحد ما تدوخ.. تحب تفضل هنا
مع نفس الناس وفي نفس المكان ولا نصدرك وتروح أي حته
تانيه..

تصدقوا إن دي فكره حلوه.. يالاً كلنا نعمل لنا إعادة
تدوير ونطلع في النهاية ناس تانيه خالص ونتصدّر كلنا لأماكن
تانيه خالص ويقي ده إعادة حياه لنا بعد موت المشاعر
والأحاسيس والملل من الحياه اللي احنا عايشينها دي ممكن
بكده نكون مفيدين لحد إحنا مانعرفوش ولا عندنا أي فكره
عنه أبداً .

إيه رأيكم؟

يا كل شاب سابه حبيبته واتجوزت واحد معاه

فلوس..

مش دايمه هي بتكون ظالمات ساحات كثير قوي بتكون

هي الضحية ومطلوب منها إنها تكون سعيدة كمان ؟

كل الشباب واحد فكره غلط عن كل البنات .. عادي ما هو ده العداء التقليدي بين الجنسين اللي بيخلي أي حاجه تحصل غلط كل واحد فيهم يرمي المسئولية علي الثاني .

يعني مثلا إثنين من سن واحد في نفس الكلية وحبوا بعض.. إزاي متخيلين في الظروف الزفت اللي إحنا فيها دي أنهم ممكن يتجوزوا بعض.. إزاي ؟ مش لازم الشاب يكسوم نفسه قصدي يكون نفسه الأول في عشر سنين على الأقل فين بقي البنت اللي ممكن تنتظره عشر سنين .ولو حبت هي تنتظر فين الأهل اللي ممكن يستحملوا ده ومايفضلوش يزنا عليها ..

" أنت مش راضيه تتجوزي ليه ؟.. أنت إيه اللي مانعك عن الجواز ؟..أنت مستنيه مين ؟.. ما هو لو أنت مستنيه حد قولي له يتقدم وإحنا نشوفه ؟.. أنت مش عايزه تتجوزي فلان ليه مع انه كويس وعنده شقه وشغال ؟."

زن.. زن.. زن..

ولما الأهل ما يلاقوش فايده في الزن يبدأوا في الضغط :
" لا ماتخرجيش - طبعا لأنهم عارفين أنها بتخرج تقابل اللي
مانعها من الجواز - ماتتكلميش في التلفون كثير.. "

ونظام قرف بقي.. يعني م الآخر يقرفوها في عيشتها عشان
توافق. ولما النظام ده يفشل هو كمان - وده بيعتمد على مدى
تمسكها بحبيبها يعني ممكن ما تفشلش وتستسلم - يبدأوا نظام
تاني خالص نظام الذل :

"أنت مش عايزه تتجوزي ليه ؟.. أنت خايفه من حاجه ؟ "

و نظام شك بقي :

"أنت فيكي حاجه ؟.. أنت عملتي حاجه وخايفه
تقوليلنا ؟.. أوعي تكوني عملتيها زى ما بنشوف في الأفلام
واتجوزي عرني.؟ أصل هي دي الحالة الوحيدة اللي تخليكي ما
توافقيش علي فلان " - فلان تاني غير الأولاني ما هو بين كل
نظام والتاني عده أشهر أو عده سنوات حسب نظام الأهل
نفسهم - ،وهنا دائما البنت بتستسلم لأن المسألة كده دخلت
في الغميق خالص. وحتي لو هي فعلاً عملتها واتجوزت عرني
برضه بتستسلم وتوافق على الفلان اللي جاي ده وخلاص لأن
غالباً حبيبها ده مش قادر يفتح بيت ولا حاجه وأهله لسه
بيصرفوا عليه ومش لاقى شغل ولا نيله وطبعاً هي قبل ما توافق
بتلجأ لحبيبها ده .. وتقوله الكلام اللي كل شاب بيعسبه
أسطوانة بتحفظها كل بنت وتسمعها لكل ولد :

" أنا رفضت كثير قبل كده والمرة دي مش قادرة أرفض..
أنا مش عارفه أعمل إيه.. إنت مش عارف هما في البيت عاملين
فيا إيه .. أنا مش عارفه أقول لهم إيه المرة دي أنا مستنيك
بقالي سنين وأنت ظروفك مش راضيه تتحسن أعمل إيه أهلي
ضاغطين عليا . "

وأنت طبعا ماتصدقش الكلام ده وتفكر إنها بنشتغللك
وبتضغط عليك أنت كمان عشان تتجوزها.. لكن حقيقي هو
ده اللي بيحصل معاها ومع كل بنت مصريه ماتقدرش تقاوم
كثير مع أهلها.. وبعدين بالعقل كده حتى لو قاومت
عشانك.. أنت بقي أخرك إيه ؟ على ما تلاقي شغل .. وتحوش
تمن الشبكة - فيه ناس مابتحبش شبكه خالص لما يكون الأب
عاقل وعارف إنهم بيحبوا بعض - وتمن حنتين العفش ومقدم
الشقة اللي مش مهم تكون أربع أود كفاية أتئين ومن غير حمام
كمان وإيجار الشقة دي وتمن الفرح والأكل والساقع.. دانست
عايز لك على الأقل خمتاشر تمناشر ألف جنيه .. طيب منين ..
في حين إن فيه غيرك أكبر منك بالعشر سنين دول وخلاص
كۆم نفسه قصدي كۆن نفسه وراجع عنده المقدرة إنه ياخذ
الشقة دي ويحبب العفش ده ويعزم المعازيم دول ويحبب الساقع
ده وطبعا يتجوز البنت دي .. يبقى من الأول يا جماعه أي
واحد عايز يحب .. يحترم نفسه ويحب بنت أصغر منه بعشر
سنين .. يعني وهو في الجامعة بنشن كده على واحده عندها
إتناشر سنه ويقول بعد ما أخرج وأشتغل أحبها وأرجع

أخطبها- ولقد استخدمنا كلمة أرجع وراجع لأن م الآخر اللي
عايز يكون نفسه في عشر سنين بس يبقى لازم يسافر لأي حته
فيها أجنب يعني سواء في مصر أو بره مصر -

فيا كل شاب.. ماتزعلش لو حبيبتك جت قالت لك
الإسطوانة دي واعذرها وقول لها مبروك وهارد لك .

ويا كل فتاه ماتاخديش المسالة بحساسية لأنك متأكدة إنه
مفلس ومش ممكن حايقدر يتجوزك يقي قاومي على أد
ماتقدري ممكن تحصل له معجزه وعمته اللي في البرازيل تموت
ويورثها ولو ده ماحصلش خلاص هارد لك صحيح وانجوزي
واحد غير أحمد يا منى !!.

لو عاوز تكون لا مؤاخذه حيوان .. نفسك تبقى
إيه ؟

من غير زعل يعني ؟ لو عندك الفرصة إنك تتقلب حيوان ..
وتعيش حياه ثانيه في شكل حيواني.. تحب تكون إيه ؟

طيب أنت عارف الأول إيه مميزات عالم الحيوان ده ؟

أولا مافيش مدارس.. مافيش طابور عيش .. مافيش
مواصلات زحمه .. حياه.. كل اللي فيها أكل وشرب وراحة
وشغل وجواز ولعب وخلاص.. مافيش أي مشاكل بتاعت يا
عمي أنا لسه متخرج ومش لاقى شقه ومرتبى على قده ..
خالص .. نيفر .. ولا سقطت يا فاشل .. تلات سنين ف
الثانوية العاميه .. طيب ما هي عاميه يبقى أنا اللي مفتوح . ؟
ومافيش كمان كمبيوتر ولا نت ولا شات ولا موبايلات أو
ميسدات. ولا الخنقه بتاعت معاك كام ولا بتشتري اللبس منين
ولا عايز جزمه جديدة ومش لاقى.. ولا البت بتاعتك بتتقل
عليك ولا الواد بتاعتك بيشغلوك ..

وزى ما فيه بين الناس تفاوت طبقي رهيب برضه بين
الحيوانات فيه تفاوت طبقي رهيب .. يعني لا مؤاخذه كلاب
وقطط وفيران وتعاين وسحالي وسلاحف الناس الذوات ..

مش زي بتوع الفقرا يعني القطه مثلا اللي في بيت أي حد من
الذوات بتاكل أحسن منك أنت شخصيا وأنت بني آدم وهي
بني ققط .. ونفس القطه لو في الشارع بتضرب بالشوز ..

طيب فتش كده جواك وشوف أنت فيك صفات من
مين..؟ وبالتالي مين أقرب صورة حيوان ممكن تتجسد فيها .

مش حاقولك حمار لأن مافيش حد يتمني يكون حمار ..
تاني.. كفاية عاش عمره اللي فات كله حمار، ولا كلب متشرد
لأن العيال حاتضربه .. ولا قط إلا إذا كان حايقني بتاع ناس
واصله وأغنيا جدا وساعتها الأكل اللي هو حايكله ممكن يأكل
أسره من الطبقة المتوسطة والشامبو والرفاهية وكل حاجه
حلوه. لكن مين يحب يتحبس ويعمل كل حاجه بميعاد عند
الناس دي؟.. ممكن أسد حر في غابة طليق الكل يخاف منه ..
ويعمل له ألف حساب أو غر سريع وجميل، أو غزال - طبعاً
البنات كلها عايزه تبقي غزلان والولاد عايزين يبقوا اسود
وغور - لكن كم واحد فينا حايقني فيل لأن صفاته الجسمانية
والنفسية تؤهله إنه يبقى كده يعني حجمه كبير وقوة تحملته
كمان كبيرة .. كتييير.

وكام واحد صفاته النفسية والجسمانية تؤهله إنه يكون فار
بيخاف ويهرب ويكتفي بأي أكل .. أو تعبان يلف حوالين
الناس وبعدين يلدعهم .. أو جمل - أعتقد الصبر اللي إحنا فيه
يبقي كلنا جمال -

وكام احد منا ممكن يكون نعامه مش قادر يواجه حياته
والضغوط اللي فيها، وكام واحد ممكن يبقى تعلق بخطط
ويرسم ويتككك لحد ما يوقع ضحيته .. أو ضيع دنيء بياكل
لحم أخواته .. أو حتى معزه . مش فاهمه حاجه في أي حاجه
خالص .

على فكره شكلنا كده كلنا حانطلع في النهاية لا مؤاخذه
معيز !!

طيب لو اخترت للي حواليك إهم يكونوا حيوانات مين
يقي إيه ؟

يعني لو اخترت لرئيسك في الشغل انه يكون حيوان ..
تفتكر حا يكون إيه .. ؟ غير حمار طبعاً .

وولادك .. ؟ أكيد قرود.

وجيرانك اللي مطلعين عينك ويرموا الزبالة من فوق على
بلكونتك .. ؟ أكيد بقر .

وسواق التاكسي اللي بيرفض يركبك عشان مش رايح الحته
البيته اللي أنت رايحها دي ويص لك من فوق لتحت كأنه
سابق قطر مش تاكسي .. أكيد كلب وابنه كمان.

ولاً البقال اللي لما تشتري منه حاجه ترجع البيت تلاقىها
ناقصة النص .. ولا مندوب المبيعات الممل اللي بيخبط عليك
ويصمم إنك تشوف معاه إيه ويدبّسك في الآخر في حاجه أنت

مش عايزها خالص.. ولا الرّكّاب اللي بيركبوا معاك
المواصلات كل يوم ونفسهم يقتلوك عشان يخلصوا من واحد
بيزاحمهم ..

ولا الفرّان اللي بيعملّك عيش لو اديته لكلب مايرضاش
ياكله .. أكيد ... " اتركها لخيالك بقى "
ولا الب " ودي كمان لخيالك أصل الجُبن سيد
الأخلاق " .

على فكره الحيوانات دي مش شتيمة يا جماعه خالص
بالعكس يعني حياتها أحسن مننا شويه.. ما فيش عندها مشاكل
غير إنها تأكل وتشرب وتتجوز وخلص .. وتعيش بالسليقة
" إيه السليقة دي بقى " يعني مافيش قانون عندها أي حد فيهم
يعمل أي حاجه وكمان القوي هو اللي بيعحكم وهو اللي
يبغلب ويسود والكبير فيهم هو أهم واحد يعني كل ما زاد
الحجم والقوه والسرعة زادت الأهمية " بيتهيألي إننا عايشين
كده برضه في حياتنا يعني ما بعدناش عن واقعنا كثير "

طيب في النهاية واجه نفسك وقول لها أنت شبه مين من
الحيوانات وأوعي .. أوعي .. أوعي الجميري يعضك .

سؤال.. ماذا تفعل إذا أخذت القرص ثم اختفيت
أسبوعووووو ع!!؟

القراء الأعزاء.. يسعدني أن أقدم لكم هذا النبأ الخطير:

لقد استطعت - بفضل مجهود سنوات من التعب والسهر - أن اخترع شيئاً ثورياً لا مثيل له أبداً .. انه قرص - لا مش فياجرا - قرص.. يجعل الإنسان يستطيع الاختفاء .. نعم يستطيع أن يختفي بعد أخذ هذا القرص لمدة أسبوع كامل .. وهذا الدواء رخيص الثمن جداً.. الشريط عشرة أقراص بخمسة جنيه بس .. خلّي الغلابة تاكل.

إيه رأيكم في الفكرة العبقريّة دي ؟؟

تعالوا نتخيل مع بعض لو ده حقيقي.. وواحد منا قدر فعلاً يخترع الاختراع ده وحب يجربه.. طبعاً حايجربه أولاً على نفسه - وهو على فكره دواء آمن جداً ومالوش آثار جانبية - وخذ فعلاً القرص .. تفتكروا إيه اللي ممكن يحصل له وللناس حواليه ..

تعالوا نتخيل كده.. إنك خدت القرص ده.. إيه أول حاجة
حاتعملها ؟ أكيد حاتروح بيتك... لأنك طبعا حاتأخذه في
المعمل.. إلا إذا كان المعمل في بدروم البيت تطلع تتسحب -
بس ليه تتسحب ماهو مافيش حد شايفك أساساً - وتقدر
تراقب كل حاجة من غير خوف إنك تتقفش .. حاجة شريرة
مش كده ؟.. طبعا حاتكون سعيد جداً في الأول.. لأنك
حاتقدر تدخل أماكن كانت محرمة عليك من الأول يعني مثلاً
تقدر تدخل - وبلاش الأفكار الوحشة دي - السينما ببلاش
والمسارح وجميع الأماكن العامة بجانا .. لكن للأسف مش
حاتقدر تركب المواصلات العامة - يعني هو أنت كنت بتقدر
تركبها أصلاً أنت يادوب بتشعبط - لأنها مزدحمة جداً..
وحاتنفصص حاتنفصص.. سواء مرثي أو إنفيزابل.. وحتى مترو
الأنفاق زحمة.. ومش معقول حاتركب تاكسي العاصمة..
ومش حاتعرف كمان تشاور لتاكسي.. يبقى لازم تمشيها يا
حلو.. أو يكون عندك عريه.. وساعتها حاتأخذ مخالفه لأن
العربية ماشيه لوحدها... يبقى ممكن تستلف عريه حدم
الجيران.. مش بقصد السرقة لا سمح الله.. بس استعاره.. تروح
بيها مشاويرك وخلص.. واهو المخالفة تروح لحد غيرك .

طيب إيه المشاكل اللي ممكن تواجهها :

أولاً.. الهدوم .. الهدوم اللي أنت كنت لابسها طبعا
اختفت معاك - " نسيت أقولكم أن الدواء ده بيخسرج عرق
يخفي الهدوم كمان .. مش مصدقيني ؟.. يعني هي جت على

دي .. - بس طبعاً لو قلعت أي حاجة من هدومك مش حاتلاقيها تاني لأنك مش حاتشوفها إلا بعد أسبوع وغصب عنك لازم تقلع على الأقل الجزمة، والشراب " بس بعيد عني الله يخليك عشان الريجه .. "

تاني مشكله هي الأكل .. يعني معدتك مش باينه لأنها فاضيه بس لما تاكل علي الأقل الأكل حايان - " أنا شفت الفيلم ده قبل كده. " - وكذلك الميه والدخان يعني لازم تستنحي وأنت بتعمل الحاجات دي .

تالت مشكله هي اللي حواليك .. أهلك سواء زوجتك أو والدتك أو حتى رئيسك في الشغل .. حايعلوا إيه .. زوجتك ممكن تظن إنك لا سمح الله هربت مع واحد تانيه - " لو أنت مشحتفها أصلاً وبتلعب بديلك " ، والدتك حاتظن إنك جرالك حاجه ..

أما رئيسك ف العمل فعالباً حايفرح ويكتب فيك تقرير زى وشك.

لكن في مقابل كده حاتكون حُر .. حُر تماماً .. تروح فين ما تحب .. وتقلع زى ما تحب - " طول مده الأسبوع بس .. " - و حاتشوف اللي عمرك ما شفته ..

بس للأسف الشديد إنك مش حاتعرف تسرق بنك لأنك حاتتجني الفلوس فين ساعتها؟ .. الناس حاتشوف الفلوس ماشيه لوحدها ف الهوا كده ؟

الحاجة الوحيدة اللي ممكن تعملها من غير ماتمسك إنك تبص .. أيوه تبص لأي شيء وأي واحد وأي مكان المدة اللي أنت عايزها .

يعني مثلاً.. ممكن تقعد تبخلق في وش واحد أنت بتحبها ومش قادر تبص في عينيها من كسوفك - من حالتك المادية طبعاً - ممكن تقرب منها.. وتقعد تقيم في عينيها .. المدة اللي أنت عايزها.. بس المشكلة بقى إن مفعول القرص يخلص فعلاً.. نتيجة عوامل التعرية والجو المصري مثلاً.. وهي تتفاجأ بواحد حاطط وشه ف وشها وعمال يبخلق .. يادي المصيبة.. المسكينة حايجيلها هارت أتاك فوراً.. وأنت حايستيلوك على العباسية طبعاً .

بس بعد ما يتعرف الدوا حاتطلع من العباسية.. وساعتها حاتكون مشكله كبيرة قوي لو كل واحد في البلد أخذ القرص ده ؟ ساعتها مش حانشوف بعض خالص لمدة أسبوع على الأقل يعني حانستريح من خلق بعض .. بس حانمشي نخبط في بعض.. ومصالح الناس حاتقف.. مين حايروح الشغل وهو مش باين أصلاً.. وكمان مش حانشوف اللجنة بتاعت المرور في أي طريق .. ولا هما حايشفونا "الله" يعني فيه وشوش معينه حانستريح منها أسبوع بحاله.. لكن كمان كل حاجه حاتعطل.. وأكد لازم يطلع قانون للحد من العبث ده.. يعني مثلاً الحكومة تعمل عطلة رسمية أسبوع في السنة.. يخصص فقط لأخذ القرص المهبب ده يعني مش سبيلله كده.. أو يمكن

القرص نفسه يحرم استخدامه زى المخدرات ..واللى يتعامل فيه
يتمسك.. وياخد له كام سنه سجن.. وهى دي أسرع وسيله
لنشر الدوا لأن المخدرات ممنوعة ومع ذلك كل الناس
بتستخدمها وعلناً كمان .

من الآخر الموضوع ده حايعمل ضجة فى البلد وطبعاً
المستفيد الأكبر منه هو المخترع شخصياً لأنه حايكسب كتير
جداً . ده طبعا لو طلع من العباسية أصلاً. لكن مافيش مانع
من الحلم يا جماعه!!

العلاقة بين القطط والفيضان اتغيرت وكما بينه
الولاد والبنات وكما بين الأخوات..
اسمعوا نادم حسني وشيري!!

عمرک شفت خرابه؟ اکید شفت البلد أصلاً ملیانه خرابات
بنعدّي عليها کل يوم. طیب عمرک بقى رکزت شویّه مع
الخرابة دي .. يعني شفت مجموعہ الققط والڤیران اللي فیها.
اکید لو الخرابه قدام بیتکم یقی ممکن تكون رکزت معاها
وأنت قاعد فی البلکونه باللیل فی الصیف حرّان کده .

المهم لو خدت بالك حتلاقي حاجه غریبة جدا بتحصل.
الققط ماعدتش بتهاجم الڤیران. آه والله .. یقی الققط قاعد
بیدور فی آکیاس الزبالة کده ویعدّي علیه الفار ولا یتهز،
ومایفکرش حتی إنه یص له ولو بص له بیدور وشه عنه ویرکز
فی الکیس اللي قدامه .. ولا یجری وراه ولا یحاول یصطاده ولا
أی حاجه. مش زی الأول الققط یتنحرر کده ویقوم یجری ورا
الفار عشان یضمن وجهه دسه بدل العیش الخاف من صفافیح
الزبالة .

طیب إیه السبب؟ بصراحة أنا كنت فاکره الأول إن الڤیران
أصبحت قوه لا یتستهان بها.. نظراً لأن عدد الجیری کثر جدا
وعملوا اتحاد ضد کل قوم من تومات البلد ونفذوا استراتيجیه

هايله في تخويف الققط وتهديدها بنسف مقار حكمها ومنشأها الهامة . لكن بعد تدقيق في الموضوع لقيت إن السبب الحقيقي هو إحنا.. أي نعم .. إحنا.. إحنا اللي بنرمي للققط أكل كثير جداً وجاهز ولا الخوجة للجري والتعب والتنطيط ورا الفيران.. وأكل إيه .. طعمه جميل يعني سبايسي ومقلي وبمكسبات الطعم كمان يبقى إيه لازمة إنها تجري ورا فار وتاكله.. ويع كله شعر وقرف .. مادام الأكل بيحيي لحسد عندها ديليفري . ده حتى الققط دلوقتي بقت بتستطعم يعني بعد ما كانت القطة تاخذ لقمة العيش وتجري بيها بعيد تاكلها والسلام بقت تدور في كل الأكياس على السمك واللحوم والفراخ.. تقدر دلوقتي لو أنت مرّتي قطه عندك في البيت ترمي لها رز وخضار .. والله تتف عليك!! يعني م الآخر كثرة عدد المعروض من الأكل خلى الققط ماقتمش بالفيران زي زمان .

كمان اكتشفت إن نفس التغيير في العلاقة ده موجود بين الولاد، والبنات مش لا سمح الله لأن علاقة البنت بالولد علاقة القط بالفار .. لأ ماحدث يفهمني غلط .. لكن يعني الأول كان الولد بيحب البنت ويحترمها ويتعذب في حبه لها ويمكن يحبها من غير هي ما تكون حاسة بيه أصلاً بس المهم إنه يحبها وخلاص ويعني لها كلمات حب جميله واسمعوا محمد فوزي في أجمل أغنيه في التاريخ لما يقول " قلمي في قلبي يا حبيبي وأنا عايش غريب عنك قلمي ولا أنت دارى بي وأنا باشكى إليك منك".

وعبد الحليم لما يقول "أهواك وأتغنى لو أنساك وانسي
روحي وياك". والبنات برضه كانوا ييغنون كلام حلو زي
فيروز مثلا "أنا حبيبي وحبيبي إلي". أو ماجدة الرومي
"يسمعي حين يراقصني كلمات ليست كالكلمات" أو زى أم
كلثوم في كل أغانيها .

لكن دلوقتي اسمعوا بقي محمد حماقي وهو يقول "مش
حاتنساني بكره حاتيجيني يوم ما تبكي ويخنفك غرورك
حاتقولي نجيني". ولا تامر حسني وهو يقول لحبيته مش فاكهه
بس الكلمات إيه بس هي زى ماتكون كده .. احمدي ربنا
انك لقيتي حد يص لك . وشيرين وهي بتقول "وبناقص
حياتي معاك من أمي وأنا باستناك". ولا بتقول أنا بيك من
غيرك مش فارقه .. وغيرهم كثير .

إيه يا جماعة اللي حصل .. هي خناقه ؟ هو إحنا متحفزين
لبعض كده ليه . هو الحب اللي بينا راح فين ؟

بعد بحث وتحليل دقيق اكتشفت إن نفس السبب السابق هو
اللي عمل فينا كده - لا مش أكياس الزبالة - كتر المعروض
للشباب من بعضهم البعض يعني البنت عارفه إن شاب يروح
وميه يحوا والشاب عارف إن فيه غير حبيته دي ميه ممكن
يجبوه ويرضوا بيه .. وهو ده السبب اللي نحلي كل واحد فيهم
يرمي من ورا ظهره وعلى طول دراعه .

عرفتوا بقي السر؟!!

لو فتحت شئمة حبيبك ممكن تعرف حالتها
النفسية وطباعها كماه!!
أه والله .

طبعاً مافيش حد يعرف المعلومة دي أساساً .. يعني اللي أنا
حاقوله ده سر من أسرار حواء ماشي .

شنطه أي واحده في الدنيا هي انعكاس لحالتها النفسية،
والذهنية وكمان انعكاس لبيتها ..

ولو كنت محظوظ تقدر تفتح شنطة أي واحده .. وده طبعاً
شيء مستحيل لأن كل واحده بتعتبر إن شنطتها دي منطقته
عسكريه ممنوع الاقتراب منها أو التصوير ..

لكن لو اعتبرنا إنك ممكن تفتح أي شنطه فأنت ممكن
تعرف منها حاجات كتيره قوي عن البنت اللي أنت معاها.
زي إيه؟ أقولك ..

أصلاً إيه الأشياء الأساسية اللي تتوقع وجودها في شنطه أي
واحدة؟ المحفظة وفيها البطاقة والفلوس والصور الشخصية للناس
القريين من قلبها.. الموبايل.. المناديل.. الماكياج الأساسي ..
نعناع عشان الريحه .. مفاتيح .. قلم وورق .

مثلاً لو لقيت شنتطتها منظمة جداً وكل شيء فيها مترتب
يعني الموبايل في مكان والمحفظة في مكان وعلبة المناديل وعلبة
الماكياج منظمين وما فيش أي حاجة زيادة وما لهاش لازمه
فيها.. يبقى البنت دي معجزه لأنها مرتبة في أفكارها
ومشاعرها، وحياتها كلها وكمات ممكن تكون ناجحة جداً في
حياتها العملية لأنها ماشيه بالمسطرة.. لكن كمان ممكن العلاقة
معاها تكون مملة جداً لأنها م الأخر علاقة بالمسطرة .

لو لقيت في الشنتطه بقى مناديل مستعمله وتذاكر أتوييس
وأقلام وحاجات ما لهاش لازمه وكراكيب.. يبقى دي واحده
مهمله ومش فاضيه ولا منظمه في حياتها وكمات ممكن تكون
مش ناجحة قوي في علاقاتها لأن مشاعرها ملخبطه وحياتها
كلها ممكن تكون ملخبطه .

لو لقيت شنتطه الواحدة ما فيهاش الحاجات الأساسية اللي
المفروض تكون موجودة زي المناديل والقلم والنعناع مثلاً يبقى
علي طول دي واحده بخيله جلده مش هاتين عليها تجيب علبة
مناديل بنص جنيه ولا ياكو نعناع بربع جنيه بلاش منها
أحسن.. لو لقيت واحده في شنتطتها فتله وإبره مثلاً يبقى دي
واحده بارانونيا.. أيوه... يعني عندها توقع للأسوأ دائماً ودي
بقي نكديه وحاتقرفك لأنك لو أتأخرت بره شويه حاتفتكر
إنك كنت مع واحده تانيه ورغم إنك ممكن تكون فعلاً مع
واحده تانيه بس المهم المبدأ .

لو لقيت شنتطتها قديمة وفيها تراب يقي دي واحده بيئة
طحن وعامله فيها بنت مش عارف مين ودي بتكون كذآبه
كده من أولها ..

لو لقيت الشنطه بقي مليانه حلويات وورق حلويات ولبان
وحاجات من دي فدي يا إما طفله في مشاعرها جدا يا إما
أكوله جدا وفي الحالتين حاتتعب معاها .

لو لقيت الشنطه فيها ماكياج كثير مبالغ فيه يقي دي
واحده ماعندهاش ثقة في نفسها أو ممكن تكون مغرورة بجمالها
وتقرفلك برضه .

أما بقي لو لقيت فيها دوا للصداع مثلاً والمغص وحاجات
كده يقي دي واحده مريضه طبعاً بالخوف من الألم . والخوف
من المجهول وتوقع الأذى في أي وقت .

كفاية ولا عايزين تعرفوا كمان ؟

كل ده من شنطه صغيره ..

باقولكم إيه يا بنات مابلاش شنطه أحسن!!

سالت نغمه قبل که با تری انت مصفوره و

خفاش ؟

۱۱۷

امال بتنام اتاج ؟

صباح الخير.. إذا كنت م الناس اللي بتحط راسها ع
المخدة تجيب الصبح .. اسمح لي أحبيك بشده وبحرارة..
وأقولك إنك محظوظ وموهوب كمان .. لأن اللي أنت فيه ده
نعمه من نعم ربنا لا يعرف معناها إلا التعساء أمثالي اللي
عندهم وقت النوم ده هو أصعب وقت في اليوم كله .

إذا كنت من اللي بيصلّوا العشا أو ما بيصلّوش خالص -
وبيناموا م الساعة تسعه مساء نوم هادي عميق مريح ويصحوا
م الفجر كلهم نشاط وحيوية ومستعدين للشغل والكفاح ..
اسمح لي أحسدك بقى دانت ربنا مدّيك هديّه لا يعرفها إلا
السّهيره أمثالي اللي الساعة بتعدّي ثلاثه صباحا عليهم وعيونهم
مفتوحة مش عارفين يقفلوها أزاى.

النوم أصلاً هو زي إعادة شحن للطاقة في جسم الإنسان.
يعني كل النشاط سواء البدني أو الذهني والحركة اللي الإنسان
ييمارسها أثناء فترة صحياه بتقلّل الطاقة الموجودة ف الجسم
ويينتج عن الحركة - خاصة العنيفة - مواد سامه " أيوه " مواد
سامه في العضلات.. لان العضلات بتتنفس في غير وجود الحرا

يعني اسمه تنفس لا هوائي... وهو عبارة عن إن العضلات
يتأخذ الأكسجين من الدم وتفرز المواد السامة دي.. وعشان
كده الإنسان لما بيعمل مجهود عضلي زي الجري مثلا ينتهج
لأنه بيعوز يدخل هوا زيادة للجسم - ده غير الناس اللي لما
بتفكر بنتهج خالص - وهو ده السبب إننا بنحس بالألم في
العضلات بعد المجهود البدني العنيف وما فيش أي حاجة ممكن
تزيل المواد السامة دي من الجسم إلا النوم.. عشان كده النوم
مهم جداً للجسم .. كمان مخ الإنسان يفرز مواد سامة برضه
لكن بنسبه أقل بكثير طبعاً.. والمواد دي هي السبب في عدم
القدرة علي التركيز عند قلة النوم .. يعني الإنسان لو ما نمش
لمدة طويلة ممكن يتسمم بمعنى الكلمة ..

علمياً العلماء - اللي مش مصريين طبعاً - صنفوا الناس إلى
نوعين من ناحية القدرة علي النوم والصحيان عصفير
وخفافيش أه والله :

النوع الأول العصفير وهما الناس اللي أول ما الدنيا تضلم..
أجسامهم تقل فيها الطاقة والعمليات الحيوية لمستوي يسمح
لهم بالنوم بدري والاستفادة من عملية إعادة شحن أجسامهم.
وأول النوم ما يطلع .. تبدأ محركاتهم في العمل بأقصى طاقه -
طبعاً مش بيشحنوا طول الليل - يعني الواحد يصحى الساعة
سته الصبح مثلاً فايق ورايق ويقوم يخلق ويلبس ويتزل في قمة
النشاط والحياة.. أو لو واحد ست بيت تصحى نشيطة
للسوق والترويق والأشغال الشاقة المترلية . ودول بتي لو قعدوا

صاحبين لحد الساعة حذاشر تبقي داهية سودا.. ما يسشفوش قدامهم. ويعانوا معاناة كبيرة جداً يعني.. ولو كان عندهم أي مناسبة ليليه يعني فرح أو حفلة أو سينما مثلاً.. يعملوا فضايح.. ويمكن يناموا كمان.. بس ف المقابل يقيموا الصبح بدري ويعيشوا حياتهم بالمسطرة زي ماجت ف الكتاب نم مبكرا واستيقظ مبكرا .

أما الخفافيش فهي العكس طبعاً.. محركاتهم بتشتغل أحسن بالليل.. ومخهم بيتفتح أكثر بالليل.. يعني لو واحد يكتب مثلاً.. الأفكار الكويسه متحيش إلا بالليل. والإبداع يشعشع معاه قوي لما الدنيا تضلّم. والوحد قصدي الوحي ما يترلش عليه إلا متأخر - الظاهر بيقي سهران بره هو كمان - أما بقى لو صادف وصحي بدري برده تبقي داهية سودا.. يبقى مش شايف قدامه. ولا فاهم حاجه. ومتّح. ومش مركّز، وموده إسود على كحلي. وكمان ممكن يصاب بأعراض جسمانية يعني صداع.. ألم ف المعدة.. غثيان.. زغلله.. دوخه - لا مش أعراض حمل ولا حاجه - طبعاً التعود من الطفولة شيء مهم جداً.. لكن ما يعوّض الاستعداد النفسي للسهر أو للنوم بدري مهما حصل.. يعني تلاقي إثنين أخوات مثلاً واحد نومت ينام م المغرب ويصحي بدري وواحد سهر .

قلة النوم عموماً لها نتائج كتيره جداً.. أهمها إن الإنسان ما يقاش شايف حاجه قدامه فعلاً.. ولا عنده أي رد فعل سريع ولا بطيء حتى.. يعني يعاني من حالة تناحه.. المشكلة فعلاً إن

فيه شعوب بأكملها فيها الظاهرة دي -- مش التاحه -- ظاهرة
الكسل.. طبعا ما هو النوم لحد الساعة إتناشر الضهر كسل..
ومصيبة لو عندك شغل بدري ..أو لو أنت عايش بالطريقة
المقلوبة دي زبي ورحت دوله أجنبية زيبي برده.. كنت
باصحى الساعة إتناشر الضهر أنزل الشارع لأي سبب.. أبقي
ماشيه أتأوب وأجرجر ف رجلي وفي حاله غيبوبه متحركة
ولسه ما فطرتش ..في حين الناس حواليا - والله العظيم -
أكاد أسمع صوت محركهم بتكركر بأقصى طاقه.. ويدوروا
حايغدوا إيه وفين.. لأنهم ببساطة فطروا الساعة ستة الصبح
وشربوا قهوتهم ونزلوا راحوا شغلهم ودلوقتي ف البريك
كمان.. لكن إحنا يا عيني علينا عايزين مطوه نفتح بيها عينينا
ع الصبح.. ويا داهيه بقي لو الواحد متا عنده مشوار الصبح..
يبقي قاتم مضروب ستين جزمه..و مش قادر يرفع راسه من
على المخدة.. وأول حاجه يعملها إنه يشرب كوباية شاي
بربري أو نسكافيه متينة عشان يعرف يفتح عنه.. دا طبعا إذا
لقى السبب القوي المقنع اللي يخليه يقوم فعلا الصبح النهارده
وماياجلش المشوار ليكره.. وبكره ده ممكن يجر أيام كتيره
قوي.. بس أقولكم علي سر ... أحلى حاجه ف الدنيا إن
الإنسان يصحى والناس نايمة بالليل.. يعيش مع نفسه كده في
هدوووووووووووووووووو.. ومافيش عريبات. ولا عادم يخنقه،
ولا عيال رايحه المدارس. وناس عماله تزغق في السوق. ولا أي
إزعاج .

والأحلي كمان من كله.. إن الإنسان يتكۆم تحت البطانية
الصبح ف الشتا ..وهو حاسس إن كل البشر برّه في الشارع
مرصرصين م الرد ورايحين شغلهم بدري وهو مستمتع بالدفا
والنوم والكسل .

عزيزي القاريء هذه ليست دعوه للكسل - قوي يعني -
بس دي وجهة نظري.

عزيزي القاريء ..م الآخر من غير زعل يا ترى أنت
عصفوره، ولا خفاش ؟

إمتى آخر مرة الناس ضحكك عليك؟

وقعت مثلاً!!

لازم نواجه أنفسنا لما نقع قدام حد ونعمل إيه ف

المواقف المخرجة دي؟؟

كل واحد فينا أكيد في وقت ما اتعرض لموقف محرج جسداً
مع ناس مايعرفهمش .. تفتكر آخر مره حصل لك فيها كده ؟
أسوأ موقف ممكن يتعرض له أي واحد كبير .. إنه يقع ..
يتكعبل في أي حفرة أو طوبه ويقع بطوله كده على ركبته أو
وشه ويتفرط في الأرض كل حته فيه تروح في ناحية .. صبح ؟
أو يكون نازل أو طالع سلم ويتزحلق عليه ويقع .. والناس
تتفرج بقى على الطويل ده لما وقع .. طبعاً ما فيش حد حايترق
بصوت عالي لكن أكيد بيضحكوا في سرهم ويمكن يفضلوا
يضحكوا لحد ما يروّحوا البيت .. قال يعني مايحصلش لهم
كده؟!

طيب أنت عندك الشجاعة الكافية إنك تحكي لحد المواقف
المحرجة دي؟!

من الموقف المحرجة برضه إنك تيجي تسلّم على حد تلاقيه
مد إيده يسلم على حد تاني من غير قصد طبعاً .

أو إنك تيجي تشرب حاجه تقلبها على نفسك. أو تيجي
يوم الفرح تسقي عروستك أو هي تسقيك الشربات - مش

عارفه إيه الموضوع البايخ ده قال يعني حايستقوا بعض الشهد
بيقوا يقابلوني - واحد فيكم يوقعها على الثاني مش كفاية توتر
الفرح وفرجه الناس عليهم لا كمان ويشربوا بعض شربات لا
وايه إجمر يعني بقعه عبقرية مش طالع ولا بالطبل البلدي. أنا
أعرف ناس اتطلقت في ساعتها عشان كده !!!

ومن الحاجات المحرجة إنك تكون طالع ميكروباص وراسك
تخبط في السقف مع انك بتركب أم الميكروباص عشر مرات في
اليوم وأصبح جسمك أتوماتيكي يعرف ارتفاع السقف لكن
تقول إيه ساعة القدر بيعمي البصر وغالباً رد فعل الواحد اللي
يتخبط ساعتها لا شعوريا انه يقول "صارخا" "!!!!!!!!!!!!!!" "ورد
فعل الناس إنها تضحك!!... عادي .

إيه تاني ؟ آه إنك تكون شايل شيله ثقيله في كيس خفيف
ويتقطع منك في شارع زحمة أو على سلم أتوبيس وتجري
والناس وراك يللملوا لك الحاجات اللي وقعت منك . يعني
تشغل نص الشعب معاك عشان شوية بصل ولا يرتقال .

أو لما الموبايل يرن في الجامع وأنت بتصلي طيب هو لازم
تأخذه معاك خلاص يعني مش قادرين يستغنوا عنك لمدة ربع
دقة . ويا عيني بقى لو الرنة هيفا "بوس الواو" .

أو أنت ماشي كده في أمان الله وفجأتن جزمك
أنت نعت صوصاً لو أنت شاريها من المحلات الشعبية على قد
فلوسك .

أما بقي أكثر موقف مخرج لو المعلوم انقطعت . ساعتها بقي
تقعد تستلف دبايس ولا حيط وإيره وتبقى مش عارف تناري
روحك من الكسوف .

أو لو جيت تشتري حاجة وطلعت فلوسك أقل من
المطلوب ساعتها تبقى عايز ترجعها وصاحب الحاجة ناقص
يشتمك ويقعد يقطّمك بالكلام .

أو لو اتصلت بجد صاحبك وغلّست عليه وبعدين طلعت
التمرة غلط .

أو لو جيت تعاكس واحده طلعت قريتك أو تبقى مصية
لو طلعت خطيتك . دي بقي فيها ضرب!!

إيه وأهلك .. كلام موقف من دول اتعرضت له ؟؟

أما ردود فعل الناس فهي بتختلف حسب السن والحالة
النفسية يعني فيه واحد يحصل له موقف من دول ويقوم مكشّر
ومايصش لحد ويكمل طريقه عادي .. وفيه اللي يضحك على
نفسه ويأخذ الأمور يسطه ممكن توصل لحد الجبل .. وفيه
واحد يصعب عليه حاله ويقف مطرحة مش عارف يعمل إيه..
بس أحسن حاجة في المواقف دي إهلك تضحك .. تطلع كل
الغم والكسوف اللي جواك وتضحك .. وخلص.

عندي كتاب ياناسه!!!

هل تعاني من الوحدة بين الناس ؟ من أحلام وحشه؟ أحياناً
تنفصل عن الواقع. تتناوبك حالات حزن غير مبرره من غير
سبب ؟ بتلاقي ضلله تدخل قلبك بدون وعي؟

مش عارف تنام بالليل إلا بصعوبة بالغة ولما تنام.. تنام نوم
متقطع لا تحس فيه بطعم الراحة. ولما تصحى الصبح تبقى مش
عايز تفتح عينيك ولا تقوم من سريرك . مش حاسس للسندنيا
بأي طعم. لم تعد الأشياء التي كانت تسعدك زمان تسعدك
الآن ؟ لا تعرف الهدف من وراء أي شيء؟

احلوا عندك اكتاب خفيف!!

هل تصاب بحالات هلع بدون داعي؟ تأتيك حالات من
الخوف المرضي.. قلبك بيدق بعنف من غير سبب.. وتعسرق
عرق بارد غزير .. وحاله من الدوار المفاحيء .. وضيق في
التنفس.. يأتي عليك الليل فتحس بأنك ستموت الآن وإنك
خائف من الموت.. وإن نفسك يتلاشى فعلاً حتي يكاد
يتقطع..

لا تريد الكلام .. ولا الأكل ولا الشرب.. ولا حتى النفس.. لا تريد أن ينادي أحد باسمك.. ولا تريد أن ترد على أحد .. كل شيء تحول في نظرك إلى لون الحداد؟

كده بقي عندك اكتئاب متوسط!!

أما لو عندك اكتئاب حاد والعياذ بالله.. فالله يرحمك من دلوقتي والحمد لله لسه ماجربتش.. الإحصائيات الرسمية العالمية تقول أن أكثر من ٨٠% من البشر يصابون في مرحلة ما من العمر بنوبة اكتئاب، وتقول أيضاً ان من أصيب بالاكتئاب قبل كده يكون أكثر عرضة للإصابة به مرة أخرى .

الأطفال أيضاً تصاب بالاكتئاب في أعمار صغيرة ومن غير سبب ברصه..

يقال أيضاً إن الاكتئاب يسبب تغير دائم في خلايا الفص الأمامي من المخ وعشان كده فهو ليس مرضاً نفسياً فقط بل في مراحله المتقدمة يسبب أعراض جسمانية خطيرة يمكن أن تصيب المريض بأزمة قلبية مميتة وأمراض أخرى مثل السكر وارتفاع ضغط الدم وحتى الإنفلوانزا والسرطان.. نتيجة انخفاض مستوى المناعة في الجسم .

ويقال أيضاً أن الاكتئاب مرض وراثي يمكن أن يوجد في عائلات بأكملها. بل إن الأم الحامل إذا أصيبت به فإن طفلها لابد وأن يصاب به في أحد فترات حياته.

ويقال أيضاً أن الاكتئاب الشديد يؤدي إلى وجود تغيرات دائمة في المخ ينتج عنها تلف في بعض الخلايا وهذا يؤدي إلى تغير دائم في سلوك المريض لا يمكن علاجه .

ويقول بعض الأطباء النفسيين إن الاكتئاب ينتج عن نقص في إفراز بعض المواد الكيميائية في المخ وهي مواد تنتج بنسب قليلة لكنها مؤثرة جداً في السلوك الإنساني السليم .. كل ما سبق يدل على مدى خطورة هذا المرض الذي تفوق خطورته أي مرض آخر .. نعم هناك أمراض قاتلة مثل السرطان أو الكبد أو الفشل الكلوي ولكن إذا صاحبها الاكتئاب فإنها تقتك بالإنسان أسرع كثيراً جداً من المريض الذي لا يعاني الاكتئاب .

لا تصدق من يقول لك حاول أن تخرج نفسك من هذا الحزن بالصلاة مثلاً أو بالقرآن أو الخروج مع أصدقاء أو مشاهدة شيء كوميدي.. أو أن إيمانك ضعيف لهذا وقعت فريسة الحزن، واليأس.. الاكتئاب ليس كل هذا.. إنه مرض عضوي مثل أي مرض.. لا شيء يزيله.. هل تستطيع الصلاة أن تشفيك من الإنفلونزا مثلاً لأبد من دواء لعلاج الأعراض أما الصلاة فهي ما يعطيك اليقين إنك حاتقون منها.. بل أن الاكتئاب قد يعد الإنسان عن الدين نهائياً ويجعله لا يرى فائدة من الصلاة ولا من القرآن ولا من علاقته بالله .. حتى إن بعض الشيوخ يقولون أن المريض في هذه اللحظة ليس عليه حرج لأنه يتصرف دون وعي ولا إرادة.

طيب والحل ايه؟

للأسف الحل الوحيد هو العلاج .. الأقراص .. للحالات البسيطة والمتوسطة فقط .. لكن المشكلة هي فيما يفعله هذا العلاج بالمخ..

حالة من البالوظة المخيه العميقه...نعم فحبة واحدة من أي مضاد للاكتئاب كفيله بتحويل أحسن مخ إلى جيلي وفيه ناس بتحب كده على فكره تحب أنها تعمل دماغ جيلي .. حاله من التناحة اللامتناهية .. لا تستطيع أن تحسب ناتج جمع أربعة وخمسة.. لا يكون لك رد فعل تجاه أي شيء .. في الأيام الأولى من العلاج .. نوم نوم نوم متواصل بلا انقطاع وبلادة ذهنيه كبيرة لأن أحد طرق العلاج هي جعل المريض لا يفكر أبداً في أي شيء.. وينام نوماً عميقاً .. ثم بعد فترة من العلاج يعتاد المريض على الأعراض الجانبية للدواء فتقل فترات النوم إلى حد ما ولكن يظل المريض قابل للنوم في كل مرة يغلق فيها عينيه.. لكنه أبداً لا يستطيع أن يفكر أو يُبدع أو حتى يكون له رد فعل طبيعي على أي شيء..

فإذا قال له أحد نكته مثلاً يعمل مثل الحمار الذي لم يفهم النكته إلا ثاني يوم فعلاً .. لا يعرف هل يضحك أم يسكت أم يرد بأي رد آخر ..

باختصار المريض لا يتفاعل مع المجتمع من حوله أبداً .

وللأسف لابد أن يستمر العلاج فترة طويلة لا تقل عن عدة شهور لأن الانقطاع عن الدواء ممكن يسبب انتكاسة قد تصل إلى حد الانتحار .

ويظل المريض حتى بعد الشفاء عرضة في أي لحظة لهذه الانتكاسة.. أو على الأقل فترات من الاكتئاب الخفيف والظلام الذي يدخل القلب بدون أي مبرر.. وعدم الإحساس بلذة للحياة حتى مع مَنْ يُحب!!

في رأيي إن الاكتئاب هو أخطر مرض يصيب الإنسان لأنه ببساطه سوف يؤدي به للإصابة بباقي الأمراض بسهولة كما إنه قد يقتل فعليا.

الأطفال أحباب الله ..
يعني إيه أطفال !!؟

حانتكلم النهارده عن العلاقة الثلاثية بين الأم والطفل
والأب - ولو إنها مش فارقه في الإثنين الآخرين -

طبعاً كلنا عارفين الكلام ده.. إن الأطفال أحباب الله .
لكن أي أطفال بالضبط؟ الطفل اللي بيكون على كتف مامته
صغير وحميل ولذيذ وكلبوظ وتقوله بس يضحك بعيط ويخلي
الدنيا كلها تضحك معاه وعليه . صح كده ؟

لكن تعالوا بقى نتكلم لو الطفل ده بتاعي أنا. سيبكم من
البامبرز والتنظيف والترجيع والغسيل والحاجات دي عشان
مايجيش راجل - كالعادة - يقول :

" ما هي دي وظيفتك في الحياة . وكل الستات بتعمل كده
وهي سعيدة . وربنا خلقتك عشان كده . " والكلام العبيط ده
- وأنا أقول النونو جايب العبط ده منين ؟ -

طيب أنا نفسي أشوف أي راجل حايقى سعيد إزاي وهو
بيعمل الحاجات دي كلها . وكمان نفسي الستات ماييقوش
أنانيات أوي كده وياخدوا السعادة دي كلها لنفسهم
ويقسّموها مع الرجالة عشان يبقوا سعداء هما كمان -

المهم ما علينا. دي أول مرحلة من مراحل الطفولة وبتعدي.

المرحلة الثانية بقي مرحلة إن الطفل يعرف يجري منك ويقولك لا. ودي مرحلة بتكون في بدايتها لذيله أوي لكن بتقلب دائماً بغم لأنه يقول لا على كل حاجة وأي حاجة لمجرد إنه يفرسك ويفرض رأيه عليك وإذا رفضتي اللي هو عايزه يعيط ويزود العياط لحد ما تزهقي وتعملي له اللي هو عايزه والرجاله غالباً في المرحلة دي بتكون عايزه تريخ دماغها فتقولك اعلمي له اللي هو عايزه وخلاص ماجتش من مره يعني لكن الطفل الخبيث بقي يفهم كده وكل مره يزود جرعة العياط والتكد خاصة أمام الرجل أو أمام ضيوف عشان إنست تلبّي له كل طلباته الخبيثة. - وأرجو ما حدّث يفهمني غلط -

المرحلة التالية المدرسة بقي أم التكد الأصلي ومش عايز ينم بدري ولا عايز يصحى بدري وكل حاجة فيه بتوجعه أيام المدارس لكن في الإجازات كل حاجة بتوجعه بتخف بمعجزة . ومش عايز يعمل الواجب والتليفزيون فيه حاجات حلوه أوي والكمبيوتر بيناديه واللعب مع أصحابه أو أخواته اللي مش طابقهم في الأيام العادية بيحلوه جدا والنوم والأكل.. يجوع بقدرة قادر كل مره تقولي له فيها قوم ذاكر ولو كان لسه واكل يبقى عايز يروح الحمام المهم يخترع أي نكد يهرب بيه من المذاكرة . وده مش بس في الكام سنه الأولى من حياته الدراسية يعني مش لما يروح ثانوية عاميه مثلاً حايعقل ويفهم مصنحته ويرحك. لا!!!!!!!!!!!!!!!!!!!! انسي يا ماما ده كل ما يكبر

وبينحجوا في المدارس - مش مهم بتفوق يعني مش حاتفرق في
الأخر صدقوني -

وأخيرا أحب أوجه نصيحة لكل الشباب اللي في مرحلة
النكد الجديد - بعد الجامعة يعني - مفيش داعي من السفر
لأنك بكتيره بره حاتفضل عشر سنين تغسل صحون ويمكن ما
تلاقيش كمان حد يشغلك!! صحيح حاتجيب فلوس لكن في
الآخر حاتعيش محروم من بلدك ولو حببت ترجع وده طبعا أمر
لازم يحصل يبقى حاتبدأ من جديد هنا في البلد بعد عشر سنين
غربه وترجع مش عارف أي حاجه يبقى حاول في بلدك مره
واثنين وعشره انجح فيها أو افشل فيها المهم إنك ترضى بقدرك
فيها .

وكل سنه وكل أسره طيبه !!

يا رجال العالم خذوا بالك
إذا كنتم تتقانونا بيننا وبينه سلمى حايكه
أحنا كماه بنقاره بينكم وبينه ريتشاد جيه !!

" شايغه الستات " - معلى مشيها الستات -

عزيزي الزوجة المطحونة في الطبخ والغسيل والترويق كل يوم... بدمتك... كام مره سمعتي الكلمتين البايخين دول من زوجك العزيز... وانتو بتفرجو على التلفزيون.. سواء كان بيتفرج على ممثلة أو مطربة بتاخذ فلوس أصلا عشان تبقى جميلة وتعقد الستات الموجودة في الدنيا .

وكام مره قلبتيها خناقه وقتيله :

" أنت عنيك زايغه على المثلات كامان .. مالها .. فيها إيه أحسن مني ؟!! "

معلى فيها كثير أحسن منك الحقيقة يعني -

وكام مره عذبتنيها بمزاجك لسبب مادي بحت النهارده أول الشهر مثلاً ومنتظره قبض المرتب بس يعني مش أي حاجه تانيه.. شوفي بقى ياخوتي .. آن الأوان إنك تتغيري وتثوري لكرامتك وتدوقيه من نفس الكاس.. آه يعني إذا كان هو بيقارن بينك وبين سلمى حايلك ويص لها ويقول لك شايغه

الستات - مشيها الستات برضه - أنت كمان لما تشوفي
فيلم فيه ريتشارد جير بصي له وقولي له:

" شايف الرجالة !! "

ويمكن كمان تزوديه شويه ..تضيفي من عندك بعد ما
تصعي:

" مش الكيب اللي إحنا متجوزينهم "

ولو عايزه تفرسه قولي له كمان:

" آدي الرجالة اللي تشرح القلب وتخلي الواحدة تقتل
نفسها عشان تبقى جميله "

يا عم الرجل اعلم إنك بتفرّج على واحد واحد ملايين
عشان تظهر في فيلم أو كليب ساعة زمن وخلاص.. وعندها
كل شيء بميعاد.. يعني النوم بميعاد والصحيان بميعاد والأكل
والشرب والحمام بميعاد... عندها مدلك خاص.. وطبيب
خاص.. وبتاع تغذية خاص.. ده غير طقم السيكيورتي
الخاص.. والشغّالين الخاص برضه.. وبعدين دي ما بتعملش أي
حاجه في أي حاجه غير إنها تكون جميله وتتم بجمالها.. يعني
ولا بترتي عيال ولا بتذاكر لهم توفيراً لنفقات المدرّسين
الخصوصيين ولا بتطبخ طبعا ولا تغسل مواعين ولا تغسل
هدوم.. ولا بتروح الشغل في ميكروباص ولا تعرفك ولا
عمرها شافتك ولا شمت ريحتك وأنت راجع من الشغل كللك
عرق وتراب ولو شافتك لا مواخذه يعني حا..... عليك!!!

وبعدين دي بتصرف ملايين على عمليات الشد والنفخ
والحقن والتحميل والتكبير والتصغير وحاجات مانعرفهاش
خالص طب دي نصها بيبقي صناعي يعني الشعر والرموش
والتضاريس والحدود والشفافيف والبطن وكل حاجة .

كان فيه فيلم أجني مره في التلفزيون البطل مسافر وجت
خطيبته تودعه فعاوز ييوسها قالت له : " نو... نو..
كولاجين.. كولاجين " .. فحب يحضنها قالت له: "نسو...
نو... سيلكون... سيلكون "

ولما سألتها ليه ده كله هي جميله من غير حاجة قالت له :
" عشان أكون أجمل يوم فرحنا . "

طيب يعمل إيه يتجوزها أزاي أساسا .. طبعاً صاحبنا اداها
سكه واختار واحده أقل منها جمالاً بس على الأقل طبيعية.

وبعدين هو أنت شفتها في بيتها شكلها إزاي مش جايز
يكون شعرها منكوش وهدومها ريحتها بصل زى اللي جنبك
دي بالظبط .

- وأنت كمان.. مش تسرحي شعرك وتليسي هدم عدله
شويه وأنتي قاعدة مع الراجل-، وبعدين بقي يا عم.. ما تبص
لنفسك وشوف شعرك عامل أزاي وشوف دقنك اللي بقالك
يومين ما حلقتهاش.. وارحمها شويه من أم الفانلة الحملات
دي.. ما حدش قال إن دراعاتك اللي كلها شعر دي فيها
سكس.. ولا سفن حتى !!

يا جماعة الغلطة مشتركة يعني إنت بتهملي في نفسك..
وأنت كمان بتهمل في نفسك. يعني مثلا ما بتحلقش دقنك
غير وأنت خارج طب وأنت في البيت لا ليه ؟

وأنت بتهمي بلبسك وأنت رايحه الشغل طب في البيت لا
ليه؟ وبعدين كلامك مع الناس اللي بره حلو وزى العسل طيب
ومع اللي في البيت كله زعيق وشخط ونكد ليه؟ والكلام لكم
انتوا الاثنين .

لازم حياتنا في البيت تكون زى حياتنا في الشارع.. يعني
لبسنا ومظهرنا يكون كويس في البيت كمان.. وبلاش التناقض
الفضيع ده ما بين منظرنا قدام الناس ومنظرنا قدام العائلة.. واحد
حايقولي:

" مانا عايز اقعد ف البيت بحريتي من غير تكتيفه .."

يا عم لازم الجمال ينح - حلوه ينح دي ؟ - من جواك
ويا ما لبس بسيط بيكون شيك .. وبعدين لما تكون أنت شيك
وحلو في البيت حاتخليها هي كمان تكون حلوه زيك.. ولازم
تعرف عزيزي الرجل إن الست كمان لها عينين بتشوف بيها
زيك بالظبط .. يعني زى مانت بتقارن بينها وبين هيفاء وهي
هي كمان بتقارن بينك وبين أحمد عز واهو أنت شايف أحمد
عز!! يعني مقارنه ظالمه ليك فيه في الميه .. طيب ليه كده.. ما
نعيش حياتنا راضيين بيها أو نحاول نغير فيها للأحسن. يعني
كل واحد فيكم يشوف الثاني فيه إيه حلو ويركز عليه. ونبطل

بقى الكلام البايع ده أحسن والله العظيم ما حانسكت لكم
بعد كده.. آه .. زي ما حاتقولوا حاتقول.. ماشي.. يعني
مش حانسيب حقنا بعد كده.. ماشي ١٩

يا كل الستات .. إذا جوازكم قالوا لكم : " شايقه
الستات " - مشيها الستات بقى خلاص - قولي له ماتديني
فلوس أروح أعمل عمليات زيها وأنا أبقى أحلى منها ميت
مره.. بس.. ساعتها حايست خالص.. وحايحط همه في قلبه
ويتفرج من سكات وهو ده المطلوب .

إلى كل البنات :
كفايه هاتيا بقم ١١

إلى كل بنت بتقف قُدام المِراية قبل خروجهما بتلات ساعات
عشان تخط ماكياج .

إلى كل بنت مضَيَّعه فلوسها على البودرة المائِية أو غير
المائِية، والماسكرا اللي ضد الميه وضد النار.. والروج اللي مش
عارفه إيه .

أرجو كي اقري الموضوع ده بعمق شويه.

كل واحد فاكِره إنها لما تخط ماكياج زى ممثلات السينما
تبقى جميله زيهم . متناسيه عن عمد أو عن عبط الله أعلم إن
الجو اللي بتصور فيه المثلة دي غير الجو اللي إحنا بنزل فيه
للشارع خالص .

يعني المثلة اللي بتخط كريم الأساس والبودرة والميك أب
الكامل دي بتعيش في جو أولاً بارد نتيجة التكييف يعني مش
حتسيح .. ثانياً نضيف مش مليون تراب زى شوارعنا كلها
يعني الميك أب مش حايسود بعد ساعة ولا اتنين يبقى بلون
الطين .

يعني الواحدة بتتعب نفسها أوي قبل ما تنزل تروح الجامعة
مثلا وتحط طبقات فوق بعضها زي طبقات الأرض وبعدين
تنزل في الحر طيب ممكن افهم ازاي حاتمسخ عرقها من على
وشها ؟ ولا الميك أب ده ييمنع العرق ؟

طيب فرضنا إن مافيش عرق .. طيب والتراب حاتمعملي فيه
إيه ؟ دا الواحدة مننا كل ما تمسخ وشها بمنديل تلاقي أكوام ..
أكوام تراب ، ويطلع المنديل اسووووود .

طيب تعالي نسألك سوا: انت بتحطي الميك أب ده لمين ؟ ..
ومش عايزين فلسفه ونقول باحطه لنفسي. لو بتحطيه لنفسك
حطيه في أودتك واقعدي بحلقي في المرايه ثلاث ساعات
متواصلة زي المجانين. ولا تقولي باحطه لصديقاتي . لأنك لو
بتحطيه لصديقاتك برضه حطيه في أودتك واعزمي صديقاتك
واقعدوا بصوا في نفس المرايه ثلاث ساعات برضه زي المجانين .
اعترفي يا أختي .. اعترفي يا بنت بقى وخلصيني . بتحطيه
لأعدائنا التقليديين . الرجاله . خلاص .. عشان تبقي حلوه في
عينهم ؟ السمرا تبقي بيضا والبيضا تبقي أبيض والعيون تبقي
كحلي وحاجه ألوان الطيف خالص .. طيب إيه رأيك إن
الرجاله بيتريقوا علي أي واحد عامله كده في نفسها ونازله
الشارع . مش مصدقاني طيب والله العظيم إن ده بيحصل وأنا
سمعتة بنفسي كثير . آخرهم كنت في العتبة باشتري بلوزه من
الشارع _ آه ما هو الصحافة ما بتأكلش عيش يبقا أشترى
منين ؟ _ وكنت واقفة مع إثنين من الشباب بيبيعوا وقدامنا

طيب إذا كان هو ده رأيهم في الميك أب اللي أنت بتطلع
عينك شرا وخط فيه وتستحملي الحر والزرقة عشان تبقى شبه
المثلة مش عارفه مين يبقى ليه بقى بنحطه من أصله .

وبعدين أصلا الميك أب ده بيخلي الواحدة عامله زى
المومياء شاحبة كأنها ميتة من يومين، ويبقى شكلها مش
طبيعي خالص .

يبقى خلاص بقى وفري الميك أب ده لسهره حلوه أو فرح
أو مناسبة اجتماعيه لكن بالنهار في الجامعة أو الخروج في الحر
والتراب يبقى حرام عليكى بقى .

ويا كل البنات كفاية ميك أب بقى .

!علائق مملکت!

على غرار الرقابة على المصنفات الفنية التي تسمح بوجود أغاني تسد النفس من أمثال هانروح الولد، ودينيا خربانه، وشربت سيجاره بني . والرقابة على الآداب العامة التي مش عارفه هي موجوده ولا لاء والتي تسمح بمسلسلات فيها نساء ترتدي ملابس مسروق نصف القماش منهن.. يجب أن يكون هناك رقابة على إعلانات المنتجات المختلفة والتي تنتشر في كل مكان حتي لا يفاجئنا إعلان يخدش الحياء التي هو أصلاً لم يعد موجوداً .. في زيارتي التاريخية الأخيرة لمدينة القاهرة وجدت إعلان ينتشر انتشار النار في الواد أبو سليم الله يرحمه وهو عبارة عن صورة واحد مزه جامده واقفه بتضحك ومكتوب تحتها - الصوره طبعاً مش المزه - دائماً جاهزه دائماً ناعمه . ونظراً لتفكيري الاقليمي المحدود - بتاع الناس الرجعيه اللي عايشين ف الأقاليم يعني - تخيلت إنها أستغفر الله العظيم بتقول كلام فارغ أوي بس لما شفت الإعلان في التليفزيون صعبت عليا البننت الحقيقه إيه يعني لما حد بيتصل بيها ف التليفون وهي بتقوله شرم ؟ دلوقتي ؟ طيب اديني خمس دقائق بس وابقى جاهزه وتتردد المقوله العظيمه بتاعت دائماً جاهزه دائماً ناعمه

103

الفهرس

- بالأ نعد مع بعض .. أكثر عشر حاجات بتكرهها في يومك
وبتكرر كل يوم ٥
- أنا بانقط.. إذن أنا موجود ١٣
- عمار يا مصر .. كيف تدبر أزمة عالميه في دوله مصريه؟؟..... ١٩
- هل أنت متصالح مع نفسك ؟..... ٢٥
- صباح الخير .. صباح النور .. وكمان بتقول صباح النور..... ٣١
- أهم حاجه في الدنيا انك تكون مستريح مع الموبايل بتاعك.... ٣٧
- إزاي تعرفي إن الشخص اللي بتحبيه ده هو نُصك الثاني؟؟؟ ... ٤٣
- هو الراجل حايخسر إيه لو قال لمراته ذات صباح:
- بحبك وحشتيني ؟..... ٥١

- عارف إيه أحسن ثلاث حاجات ف الدنيا ؟ ٥٧
- تخيل لو بإيدك تبعد البعدا في أبعد بعد بعيد عن بعدنا خالص .. ٦٣
- إعاده تدوير المصريين!! ٧١
- يا كل شاب سابه حبيته واتجوزت واحد معاه فلوس ٧٧
- لو عاوز تكون لا مواخذه حيوان .. نفسك تبقي إيه ؟ ٨٣
- سؤال .. ماذا تفعل إذا أخذت القرص ثم اختفيت أسبوع ؟! ٨٩
- اسمعوا تامر حسني وشهرين!! ٩٧
- لو فتحت شنطة حبيبتك ممكن تعرف حالتها النفسية وطباعها
- كمان!! ١٠٣
- سألت نفسك قبل كده يا ترى أنت عصفوره ولا خفّاش ؟. ١٠٩
- إمى آخر مرّة الناس ضحككت عليك؟ ١١٧
- عندي اكتاب ياناس!!! ١٢٣

الأطفال أحباب الله .. يعني إيه أطفال ؟ ١٣١

يا رجال العالم خُذُوا بالكُم !!! ١٣٧

إلى كل البنات : كفايه ما كياج بقى ! ١٤٥

إعلانات هامه !! ١٥١

